

বুজবিলাস

যৎকিঞ্চিৎ অপূৰ্ণ মহাকাব্য

কবিকুলতিলকম্



৮টি উপযুক্তভাইপোম্ প্রণীত

দুপুপ্য

কলিকাতা.

সংস্কৃত যন্ত্রে মুদ্রিত

এস কে লাহিড়ি এণ্ড কোং কর্তৃক প্রকাশিত

সন ১২৯১ সাল।

মাননীয় শ্রীযুক্ত বাবু তারাপ্রসন্ন মুখোপাধ্যায় যশোহরহিন্দুধর্মরক্ষিণীসভাসম্পাদক মহাশয় সমীপেষু


সবিনয়ং সবল্হমানং নিবেদনম্

গোড় দেশের সর্গপ্রদান সমাজ নবদ্বীপের সর্গপ্রদান স্মার্ত শ্রীল
শ্রীযুক্ত ব্রজনাথ বিহারত্ন ভট্টাচার্য্য, বিধবাবিবাহের অশাস্ত্রীয়তা
প্রতিপন্ন করিবার নিমিত্ত, শ্রীমতী যশোহরহিন্দুধর্মরক্ষিণী সভার
বৎসরিক অধিবেশনে, সংস্কৃত ভাষায় যে বক্তৃতা করিয়া-
সমাচারচন্দ্রিকানামক সংবাদপত্রের ৭৩ ভাগের ১২১
তাহা মুদ্রিত হইয়াছে। এই চমৎকারিণী বক্তৃতা, যথোচিত
সবিশেষ অভিনিবেশ সহকারে, পাঠ করিয়া, আমার অন্তঃ-
করণে সে সমস্ত ভাবের আবির্ভাব হইয়াছে, তৎসমুদয়, লিপিবদ্ধ
করিয়া, ব্রজবিলাস নামে, মুদ্রিত ও প্রচারিত করিলাম। গ্রন্থের
অধিকতর গৌরববর্দ্ধনবাসনায়, এই অপূর্ণ মহাকাব্য, শ্রীমতী
যশোহরহিন্দুধর্মরক্ষিণী সভা দেবীর অতি কমনীয় কোমলতম চরণ-
কমলে, চন্দনচর্চিত কুমুদাঞ্জলি স্বরূপ, সর্গপিত হইতেছে। আপনি,
দয়া প্রদর্শন পূর্বক, এই অতি অকিঞ্চিৎকর অথচ অতি মনোহর
উপহারপ্রদানবার্ত্তা শ্রীমতী সভা দেবীর শ্রবণগোচর করিলে,
আমি নিরতিশয় অনুগ্রহীত হইব কিমধিকেনেতি।

সন ১২৯১ সাল।

১লা আশ্বিন।

অনুগ্রহপ্রত্যাশাপন্নম্
কস্যচিৎ উপযুক্তভাইপোস্য



বুজবিলাস ।

প্রথম উল্লাস ।



ব্রজনাথ বিদ্যারত্ন বেহুদা পণ্ডিত ।
আপাদমস্তক গুণ রতনে মণ্ডিত ॥
শুভ ক্ষণে তাঁরে মাতা ধরিল উদরে ।
নাহি দেখি সম তাঁর ভুবন ভিতরে ॥
বুদ্ধির তুলনা নাই যেন বৃহস্পতি ।
রূপের তুলনা নাই যেন রতিপতি ॥
রসিকের চূড়ামণি সর্বগুণাকর ।
সুশালের শিরোমণি দয়ার সাগর ॥
সুবোধের অগ্রগণ্য দানে কণ প্রায় ।
যেই যে বিধান চায় সেই তাহা পায় ॥
এ বিষয়ে কেহ নাহি তাঁহার সমান ।
এক মাত্র তিনি নিজ উপমার স্থান ॥
তাঁহার গুণের কিছু করিব বর্ণন ।
অবহিত চিন্তে সবে করিহ শ্রবণ ॥

যদি আপনারা বলেন, তুমি কে হে বাপু ; তোমার এত বড় আশ্পর্কী কেন । তুমি, বামন হয়ে, আকাশের চাঁদ ধরিতে চাও । তোমার এমন কি ক্ষমতা, যে তুমি বিশ্ববিজয়ী দিগ্বিজ পণ্ডিতের গুণ বর্ণন করিবে । আমার উত্তর এই, সবিশেষ না জানিয়া শুনিয়া, মহা আশ্চর্য্য ছেয়জ্ঞান করিবেন না । আমি এক জন ; যথার্থ কথা বলিতে গেলে, আমি নিতান্ত যেমন তেমন এক জন নই । আমার পরিচয় শুনিলে, আপনারা চমকিয়া উঠিবেন, সে বিষয়ে এক কড়ারও সংশয় নাই । “বামন হয়ে আকাশের চাঁদ ধরিতে চাও”, এ কথাটি, বোধ হয়, আপনারা ঠাট্টা করিয়া বলিয়াছেন । আমি কিন্তু, ঠাট্টা না ভাবিয়া, শ্রদ্ধা জ্ঞান করিতেছি । আমাদের বংশমর্যাদা অতি বেয়োদ্ভূত বামন বংশের আদিপুরুষ ভারতবর্ষের পঞ্চম অবতার । তিনি, ত্রিলোকবিজয়ী বলি রাজার যজ্ঞক্ষেত্রে উপস্থিত হইয়া, কি ফেসাং, কি কারখানা করিয়াছিলেন, তাহা কি কখনও আপনাদের কণকুহরে প্রবেশ করে নাই ।

বাপ কা বেটা সিপাহী কা ঘোড়া

কুছ না রহে তব ভি খোড়া ।

যদিও, যুগমাছাত্ম্যে, আদিপুরুষের সম্পূর্ণ ক্ষমতা আমাদের না থাকে, কিছু ত থাকিবে । তিনি এক পদে সমস্ত আকাশমণ্ডল আক্রমণ করিয়াছিলেন ; আমরা কি, তাঁহার বংশের তিলক হইয়া, আকাশমণ্ডলের এক অংশেও হাত বাড়াইতে পারিব না । অবশ্য পারিব । আর, ইহাও বিবেচনা করা আবশ্যিক, আমি যাঁহাকে ধরিতে চাহিতেছি,

তিনি আকাশের চাঁদ নহেন, নদিয়ার চাঁদ (১) । নদিয়ার চাঁদকে ধরিতে যাওয়া, আমার মত বেহুদা ব্যাহারের পক্ষে, নিতান্ত অসংসাহসিকের কার্য বলিয়া বোধ হয় না ।

এক সময়ে, চৈতন্য দেব, নদিয়ার চাঁদ বলিয়া, খ্যাত হইয়াছিলেন । বোধ হয়, তাঁর রঙটা বেস করসা ছিল, তাই তাঁকে নদিয়ার চাঁদ বলিত । যথার্থ গুণ প্রকাশ অনুসারে বলিতে গেলে, বিদ্যারত্ন খুড়ই নদিয়ার প্রকৃত চাঁদ । নদিয়ার চাঁদ, অর্থাৎ নদিয়া উজ্জ্বল করিয়াছেন । তাঁহার পূর্বে, রঘুনাথ, জগদীশ, গদাধর, রঘুনন্দন প্রভৃতি নদিয়াকে যেমন উজ্জ্বল করিয়াছিলেন, শ্রীমান বিদ্যারত্ন খুড়, নিজগুণে, তদপেক্ষা শত সহস্র গুণে, অধিক উজ্জ্বল করিয়াছেন । বলিতে কি, খুড় যে এত বড় ভাগ্যধর হইবেন, ইহা, ক্ষণ কালের জন্যে, আমাদের কাহারও খেয়ালে আইসে নাই ।

(১) আমি এ স্থলে, শ্রীমান ব্রজনাথ বিদ্যারত্নকে “নদিয়ার চাঁদ” বলিলাম । কিন্তু শ্রীমতী যশোহরহিন্দুধর্মরক্ষিণী সভাদেবী, ইতিপূর্বে, শ্রীমান ভুবনমোহন বিদ্যারত্নকে “নবদ্বীপচন্দ্র” অর্থাৎ নদিয়ার চাঁদ বলিয়াছেন । উভয়েই বিদ্যারত্ন উপাধিধারী, উভয়েই স্ব স্ব বিষয়ে সর্ব প্রধান বলিয়া গণ্য, বিদ্যাবুদ্ধির দোড়ও উভয়ের একই ধরণের । সুতরাং, উভয়েই নবদ্বীপচন্দ্র অর্থাৎ নদিয়ার চাঁদ বলিয়া প্রতিষ্ঠিত হইবার যোগ্য পাত্র, সে বিষয়ে সংশয় নাই । কিন্তু এ পর্য্যন্ত, এক সময়ে দুই চাঁদ দেখা যায় নাই । সুতরাং, এক জন বঁই, দুজনের নদিয়ার চাঁদ হইবার সম্ভাবনা নাই । কিন্তু, উভয়ের মধ্যে এক জন বঞ্চিত হইবেন, সেটাও ভাল দেখায় না ; এবং, ঐ জন্যে, দুজনে হুড়হুড়ি ও গুঁতগুঁতি করিয়া মরিবেন, সেটাও ভাল দেখায় না । এ জন্য, আমার বিবেচনায়, সমাংশ করিয়া, দুজনকেই, এক এক অর্ধচন্দ্র দিয়া, সন্তুষ্ট করা উচিত । শ্রীমতী যশোহরহিন্দুধর্মরক্ষিণী সভাদেবী আমার এই পক্ষপাতবিহীন ক্ষয়তা ঘাড় পাতিয়া লইলে, আর কোমও গোলযোগ বা বিবাদ বিসংবাদ থাকে না । এক্ষণে, তাঁর বৈরূপ মরজি হয় ।

দ্বিষাশ্চরিত্রং পুরুষস্য ভাগ্যং

দেবা ন জানন্তি কুতো মনুষ্যাঃ ।

ঈলোকের চবিত্র ও পুরুষের ভাগ্যের কথা দেবতারা

জানেন না, মানুষে কেমন কবিয়া জানিবে ।

ইতি পূর্বে বলিয়াছি, আমার পরিচয় শুনিলে, আপনারা চমকিয়া উঠিবেন । কিন্তু, অন্তমনস্ক হইয়া, এ পর্য্যন্ত আত্মপরিচয় দিতে পারি নাই । এজন্য, যদিও আপনারা, সাহস করিয়া, মুখ ফুটিয়া বলিতে না পারুন, মনে মনে বিরক্ত হইতেছেন, তাহার সন্দেহ নাই । বোধ করি, পরিচয় দিতে বিলম্ব করা আর, কোনও মতে, উচিত হইতেছে না । যেরূপ দেখিতেছি, তাহাতে, আমি কে, ও কি ধরণের জানোয়ার, তাহা জানিবার জন্য, আপনারা ছটফট করিতেছেন । যদি বলেন, তবে পরিচয় দিতে এত বিলম্ব ও আড়ম্বর করিতেছ কেন । তাহার কারণ এই, পরিচয় দিলেই, ভূর ভাঙিয়া যাইবে ; তাহা অপেক্ষা, চালাকি ও গোলমাল করিয়া, যত ক্ষণ আপনাদিগকে ফাঁকি দিতে পারি, সেই লাভ, সেই বাহাদুরি । যদি বলেন, লোককে ফাঁকি দেওয়া কি ভদ্রের কৰ্ম্ম । এ বিষয়ে বক্তব্য এই, আপনারা ভদ্র কাহাকে বলেন, তাহা আমি জানি না । অভিধানে ভদ্র শব্দের যে অর্থ গিথিয়াছিলাম, সে অর্থের ভদ্র শব্দে নির্দেশ করিতে পারা যায়, এরূপ লোক দেখিতে পাই না । তবে

সদ্যদাচরতি শ্রেষ্ঠস্তত্তদেবেতরো জনঃ ।

ইতর লোকে ভদ্র লোকের দৃষ্টান্তের অনুবর্তী হইয়া চলিয়া থাকে ।

এই ব্যবস্থা অনুসারে, আমরা, শ্রীমান্ নদিয়ার চাঁদ বিদ্যা-
রত্ন খুড় প্রভৃতি এ কালের ভদ্রশব্দবাচ্য মহাপুরুষদিগের
দৃষ্টান্ত অনুসারে, চলিতে শিখিতেছি । কিছু কাল অভ্যাস
করিলে, হয় ত, ব্যুৎপত্তিবলে, তাঁহাদের ঘাড়ে চড়িয়া
বসিব । ইহার পর, আর তাঁহারা আমাদের কাছে কলিকা
পাইবেন না ।

বাঁশের চেয়ে কন্দি দড় ।

শিষ্যবিদ্যা গরীয়সী ॥

আমি বড় মজার লোক, বাজে গোল করিয়া, মিছা সময়
নষ্ট করিতেছি । পণ্ডিত্য দিতে আর বিলম্ব করা, বোধ
হয়, ভাল দেখাইতেছে না । পাঠক মহাশয়েরা শুনুন,
আমি কে । শুনিয়া কিন্তু, আপনারা অবাক হইবেন,

আমি উপযুক্ত ভাইপো ।

কেমন, এখন; আমি কে, চিনিলেন । যদি কেহ বলেন,
চিনিতে পারিলাম না ; তাঁর বাপ নির্বংশ হউক । কি
পাপ ! কি বালাই ! কি বিড়ম্বনা ! অনায়াসে, আমার
পরম রমণীয় প্রফুল্ল মুখকমল হইতে, অতি বিষম অভি-
সম্পাতবাক্য বিনির্গত হইল । অথবা, সে জন্তে ভাবনাই
বা কি ; কলিকালে ভ্রান্তিসম্পাত ফলে না । যদি ফলিত,
রক্ষা থাকিত না । বিদ্যাভুড়ভুড়ি বিদ্যাবাগীশ খুড় মহা-
শয়েরা, কথায় কথায়, অভিসম্পাত দিয়া থাকেন ।
তাহাতে, এ পর্য্যন্ত, কার কি হয়েছে । চুলায় যাউক, আর
বাজে কথায় কাজ নাই ।

যদি বলেন, তুমি এত কাল কোথায় ছিলে । তুমি যে আজও নরলোকে বিরাজমান আছ, তাহার কোনও নিদর্শন পাওয়া যায় নাই কেন । ইহার উত্তর এই, আমি অজগরের ন্যায় অলস, কুস্তকর্ণের ন্যায় নিদ্রালু; সহজে নড়িতে চড়িতে ইচ্ছা করে না ; আর, নিদ্রাগত হইলে, সহজে নিদ্রাতঙ্গ হয় না । বিবেচনা করিতে গেলে, আমি এক রকম খুব সুখে কাল কাটাইতেছি । তবে কি জানেন, শ্রীমান্ বিদ্যাবাগীশ খুড়দের বাড়াবাড়ি দেখিলে, উপযুক্ত ভাইপো হইয়া, উপেক্ষা করিয়া নিশ্চিন্ত থাকিলে, ধর্ম্মবহির্ভূত ব্যবহার হয় । এজন্য, বহুবিবাহ বিষয়ক বিচারের সময়, মহামহোপাধ্যায় পূজ্যপাদ শ্রীমান্ তারানাথ তর্কবাচস্পতি ভট্টাচার্য্য খুড় মহাশয়কে কিছু উপদেশ দিয়াছিলাম । সম্প্রতি, মহামহোপাধ্যায় পূজ্যপাদ নদিয়ার চাঁদ শ্রীমান্ ব্রজনাথ বিদ্যারত্ন ভট্টাচার্য্য খুড় মহাশয়, বিধবাবিবাহ বিষয়ক বিচার উপলক্ষে, যে অদৃষ্টচর অশ্রুতপূর্ব্ব পাণ্ডিত্য প্রকাশ করিয়াছেন, তৎসময়ে তাঁহাকে কিছু উপদেশ না দিলে, আমার মত বথার্থ উপযুক্ত ভাইপোর উপর পক্ষপাতিতা দোষের আরোপ হইতে পারে ; নিরবচ্ছিন্ন সেই ভয়ে, বিদ্যারত্ন খুড়কে উচিত মত উপদেশ দিতে, বদ্ধপারিকর হইলাম ।

ইতি শ্রীব্রজবিলাসে কহাকাব্যে কল্যাণ^৩ উপযুক্ত ভাইপোস্ত কৃতৌ
প্রথম উল্লাসঃ ।

দ্বিতীয় উল্লাস ।

শুনিয়াছিলাম, নবদ্বীপ গৌড় দেশের সৰ্ব্বপ্রধান সমাজ ।
শ্রীমান্ ব্রজনাথ বিদ্যারত্ন খুড় সেই সৰ্ব্বপ্রধান সমাজের সৰ্ব্ব-
প্রধান স্মার্ত্ত । সুতরাং, এ দেশে, স্মৃতিশাস্ত্র বিষয়ে,
বিদ্যারত্ন খুড়র জুড়ি নাই । তিনি যে ব্যবস্থা দেন, তাহা,
বেদবাক্যের ন্যায়, অভ্রান্ত ও অকাট্য ; কেহ, সাহস করিয়া,
তাহাতে দোষারোপ করিতে অগ্রসর হয় না । তাঁহার
বিষয়ে অনেক প্রশংসার কথা শুনিলাম ; এবং, শুনিয়া
শুনিয়া, তাঁহার উপর বেয়াড়া ভক্তি জন্মিয়াছিল । কিন্তু,
কখনও তাঁহাকে পাপক্ষে নিরীক্ষণ করি নাই । এজন্য, সদা
সৰ্ব্বদা মতলব করিতাম, যেখানে পারি, একবার শ্রীমান্
নদিয়ার চাঁদকে নয়নগোচর করিয়া, মানবজন্ম সফল
করিব । দৈবস্বযোগে, এক দিন, অশুভ ক্ষণে, বিনা চেষ্টায়,
তাঁহাকে দেখিতে পাইলাম । দেখিয়া কিন্তু, আমার পূৰ্ব্ব-
সঞ্চিত ভক্তিভাব উড়িয়া গেল । অবাক ও হতজ্ঞান হইয়া,
ভাবিতে লাগিলাম, ও মা ! ইনিই ব্রজনাথ বিদ্যারত্ন ;
ইনিই এ দেশের সৰ্ব্বপ্রধান সমাজের সৰ্ব্বপ্রধান স্মার্ত্ত ;
ইহারই এত প্রশংসা শুনিলাম ; ইহাকেই এত দিন এত
ভক্তি করিতাম । বলিতে কি, আমার মনটা বেয়াড়া
খারাপ হইয়া গেল ।

আমি পূৰ্বে কখনও বিদ্যাসাগরকে দেখি নাই । এক
দিন ইচ্ছা হইল, সকলে লোকটার এত প্রশংসা করে,

অতএব, ইনি •কিরূপ জানোয়ার, আজ একবার দেখিয়া আসিব । তাঁহার আবাসে উপস্থিত হইলাম । অব্যবহিত দ্বার, কেহ বারণ করিল না ; একবারে উপরে উঠিয়া, তাঁহার ঘরে প্রবিষ্ট হইলাম ; দেখিলাম, লোকারণ্য । এক টেবিলের চারি দিকে, সাত আট জন বসিয়া আছেন ; আর এক দিকে, প্রায় চল্লিশ পঞ্চাশ জন দাঁড়াইয়া আছেন । তাঁহাদের এক জনকে জিজ্ঞাসা করাতে, তিনি কহিলেন, ঐটি বিদ্যাসাগর, ঐটি ভাটপাড়ার আনন্দচন্দ্র শিরোমণি, ঐটি নবদ্বীপের প্রধান স্মার্ত ব্রজনাথ বিদ্যারত্ন । শ্রবণমাত্র, এক উদ্যোগে দুই মনস্কামনা পূর্ণ হইল, এই ভাবিয়া, আত্মলাদে গদগদ হইলাম । বিদ্যারত্ন ও বিদ্যাসাগর, উভয় জানোয়ারকেই, কিয়ৎ ক্ষণ, অনিমিষ নয়নে, নিরীক্ষণ করিলাম । দেখিলাম, শ্রীমান্ বিদ্যারত্ন খুড়, উকীলের মত, বক্তৃত্তা করিতেছেন ; বিদ্যাসাগর বাবাজী, জজের মত, তাঁহার বক্তৃত্তা শুনিতেছেন । উপবিষ্ট বিষয়ী লোক গুলি বিদ্যারত্নকে লইয়া আসিয়াছেন । দণ্ডায়মান লোকগুলি বিদ্যাসাগরের নিকটে আসিয়াছিলেন ; আজ আপনারা যান বলিয়া, তিনি তাঁহাদিগকে বিদায় দিয়াছেন ; তাঁহারা, চলিয়া না গিয়া, দাঁড়াইয়া তামাসা দেখিতেছেন । প্রায় দুই ঘণ্টা কাল, যাহা দেখিলাম, শুনিলাম, ও বুখিলাম ; পাঠক-বর্গের অবগতি জন্য, সে সমস্ত সংক্ষেপে উল্লিখিত হইতেছে ।

সাতক্ষীরার জমীদার বাবু প্রাণনাথ চৌধুরীর যত্ন হইয়াছে । তাঁহার দুই স্ত্রী ও চারি পৌত্র বিদ্যমান । দুই

স্ত্রীর গর্ভজাত দুই পুত্র, দুই দুই পুত্র রাখিয়া, পিতার জীবদ্দশায়, প্রাণত্যাগ করিয়াছেন। এক পুত্রের দুটি ঔরস পুত্র, এক পুত্রের দুটি দত্তক পুত্র। ঔরস পৌত্রের উপনয়ন হয় নাই, দত্তক পৌত্রের উপনয়ন হইয়াছে। প্রাণনাথ বাবুর শ্রাদ্ধ কে করিবেন, এ কথা উপস্থিত হইলে, তাঁহাদের গুরুদেব প্রসিদ্ধ পণ্ডিত জানকীজীবন ঞায়রত্ন ব্যবস্থা দেন, উপনীত দত্তক পৌত্র শ্রাদ্ধ করিবেন। তদনুসারে, দত্তক পৌত্র, চতুর্থ দিবসে, প্রাণনাথ বাবুর শ্রাদ্ধ করিলেন। শ্রাদ্ধসভায়, অনেক বড় বড় বিদ্যাবাগীশ খুড়, উপস্থিত থাকিয়া, কার্য্য সম্পন্ন করেন, এবং, এই শ্রাদ্ধ শাস্ত্রের বিধি অনুসারে অনুষ্ঠিত হইল, এই মর্মেণ্নে এক ব্যবস্থা পত্রে স্ব স্ব নাম স্বাক্ষর করিয়া, বিদায় লইয়া চলিয়া গেলেন।

অনুপনীত পৌত্রের পিতামহী, সপত্নীর পৌত্র শ্রাদ্ধ করিল, তাঁহার পৌত্র শ্রাদ্ধ করিতে পাইল না, ইহাতে অতিশয় অসন্তুষ্ট হইলেন, এবং দত্তক পৌত্রের কৃত শ্রাদ্ধ শাস্ত্রসিদ্ধ হয় নাই, ইহা প্রমাণ দ্বারা প্রতিপন্ন করিবার নিমিত্ত, বড় বড় বিদ্যাবাগীশ, খুড়দিগকে ডাকাইলেন। ইহা কাহারও অবিদিত নাই, বিদ্যাবাগীশ খুড় মহাশয়েরা ব্যবস্থা বিষয়ে কল্পতরু : কল্পতরুর নিকটে যে যাহা প্রার্থনা করে, সে তৎক্ষণাৎ তাহা প্রাপ্ত হয়। সেইরূপ, বিদ্যাবাগীশ খুড়দের নিকটে যে যে রূপ ব্যবস্থা চায়, সে তাহা পায়, কেহ কখনও বঞ্চিত হয় না। তবে একটু বিশেষ এই, কল্পতরুর নিকট তৈলবট দাখিল করিতে

হয় না; বিদ্যাবাগীশ খুড়রা, বিনা তৈলবটে, কাহারও উপর নেক নজর করেন না। যাহা হউক, তাঁহাদের দয়াগুণে ও উপদেশবলে, একাদশ দিবসে, পুনরায় প্রাণনাথ বাবুর শ্রাদ্ধ হইল। অনেকের ভাগ্যে একটা শ্রাদ্ধই ঘটিয়া উঠে না; প্রাণনাথ বাবুর কি সৌভাগ্য, তিনি অনায়াসে, উপস্থাপরি, দুইটা শ্রাদ্ধ ভোগ করিলেন। এই শ্রাদ্ধসভাতেও, বড় বড় বিদ্যাবাগীশ খুড় মহাশয়েরা, উপস্থিত থাকিয়া, কার্য্য শেষ করিয়া, বিদায় লইয়া চলিয়া গেলেন।

শ্রাদ্ধের পরেই, প্রাণনাথ বাবুর সমস্ত বিষয় চক্ষিণ পরগণার কালেক্টর সাহেবের হস্তে গেল। দুই শ্রাদ্ধই, বাজারে দেনা করিয়া, সম্পাদিত হইয়াছিল; এজন্য, উভয় পক্ষকেই, শ্রাদ্ধের খরচের জন্য, কালেক্টর সাহেবকে জানাইতে হইল। তিনি কহিলেন, এক বাটীতে এক ব্যক্তির দুই শ্রাদ্ধ কেন হইল, ইহার কারণ না জানাইলে, তিনি টাকা দিতে পারিবেন না। দত্তকপক্ষীয়েরা, বিদ্যাসাগরের নিকটে গিয়া, যাহাতে তাঁহার টাকা পান, তাহার উপায় করিয়া দিতে বলিলেন। বিদ্যাসাগর সবিশেষ সমস্ত অবগত হইয়া কহিলেন, আপনাদের টাকা পাইবার কোনও প্রতিবন্ধক দেখিতেছি না। আপনারা যথাশাস্ত্র কার্য্য করিয়াছেন। আপনারা কালেক্টর সাহেবকে জানাইবেন, গুরুদেব জানকীজীবন ন্যায়রত্ন আদেশ করিয়াছিলেন; তদনুসারে, আপনারা চতুর্থ দিবসে শ্রাদ্ধ কার্য্য সম্পন্ন করিয়াছেন। ইহাতেও যদি তিনি ওজর করেন, আমরা বলিবেন, আমি উপায় করিয়া দিব। তাঁহার,

বিদ্যাসাগরের উপদেশ অনুসারে, কালেক্টর সাহেবকে জানাইলেন ।

প্রথম শ্রাদ্ধ শাস্ত্র অনুসারে হয় নাই, এজন্য আমাদিগকে, একাদশ দিবসে, পুনরায় শ্রাদ্ধ করিতে হইয়াছে, ইহা তিন্ন দ্বিতীয় পক্ষের আর জবাব দিবার পথ ছিল না । সুতরাং, প্রথম শ্রাদ্ধ অসিদ্ধ, দ্বিতীয় শ্রাদ্ধ শাস্ত্র অনুসারে হইয়াছে, এই মর্ম্মের ব্যবস্থাপত্র সংগ্রহ আবশ্যক হইয়া উঠিল । তাঁহারা অধমতারণ ব্রজনাথ বিদ্যারত্ন খুড়র শরণাগত হইলেন । বিদ্যারত্ন তাদৃশ ব্যবস্থা দিতে সম্মত হইলেন, এবং তাঁহাদের সঙ্গে বিদ্যাসাগরের নিকটে আসিয়া কহিলেন, আমি একটি ব্যবস্থার কথা বলিব, শুনিয়া আপনাকে সম্মতি দিতে হইবেক । বিদ্যাসাগর কহিলেন, আপনকার যাহা বক্তব্য আছে, বলুন । তদনুসারে, বিদ্যারত্ন বিদ্যাপ্রকাশ করিতে আরম্ভ করিলেন ।

কিয়ৎ ক্ষণ পরে, বিদ্যারত্ন এমন একটি বচন আরম্ভ করিলেন যে, তাহা দ্বারা, প্রথম শ্রাদ্ধ অসিদ্ধ ও দ্বিতীয় শ্রাদ্ধ শাস্ত্রসিদ্ধ বলিয়া, বোধ হইতে পারে । এই বচন শুনিয়া, বিদ্যাসাগর বিদ্যারত্নকে জিজ্ঞাসা করিলেন, আপনি ও পক্ষের ব্যবস্থা কি দেখিয়াছেন । বিদ্যারত্ন অম্লানবদনে উত্তর করিলেন, দেখিয়াছি কি, আমি ঐ ব্যবস্থায় নাম স্বাক্ষর করিয়াছি । বিদ্যাসাগরের বোধ ছিল, বিদ্যারত্ন ঐ ব্যবস্থায় সম্মত নহেন, এজন্য বিপরীত পক্ষের সমর্থন করিতেছেন । বিদ্যারত্ন পূর্ব ব্যবস্থায় নাম স্বাক্ষর করিয়াছেন, এখন আবার, ঐ ব্যবস্থায় দোষারোপ করিয়া,

বিপরীত পক্ষের পোষকতা করিতে প্ররত্ত হইয়াছেন, ইহা বুঝিতে পারিয়া, তিনি কিয়ৎ ক্ষণ হতবুদ্ধির মত হইয়া রহিলেন, অনন্তর বিদ্যারত্নকে সম্বোধন করিয়া কহিলেন, আপনি চান কি ; আপনি ত বড় মজার লোক ; পূর্বে যে ব্যবস্থায় স্বাক্ষর করিয়াছেন, এখন আবার, ঐ ব্যবস্থা শাস্ত্রবিরুদ্ধ বলিয়া, বিচার করিতে বসিয়াছেন । আপনাকে জিজ্ঞাসা করি, যখন পূর্বে ব্যবস্থায় স্বাক্ষর করেন, তখন কি এ বচনটি আপনকার উপস্থিত হয় নাই । বিদ্যারত্ন, মহাস্বা বদনে, উত্তর করিলেন, ব্যবস্থা দিবার সময় কি অত বচন কখন দেখা যায় । এই অদ্ভুত কথা শুনিয়া, বিদ্যাসাগর কহিলেন, বিদ্যারত্ন মহাশয়, ও কথা উচ্চৈঃস্বরে কহিবেন না । ঐ দেখুন, ন্যূনাধিক পঞ্চাশ জন ভদ্র লোক দাঁড়াইয়া কৌতুক দেখিতেছেন । ইঁহারা নানা স্থানের লোক, এখান হইতে বহির্গত হইয়াই, বলিতে আরম্ভ করিবেন, নবদ্বীপের প্রধান স্মার্ত্ত আপন মুখে কবুল দিলেন, ব্যবস্থা দিবার সময় বচন কখন দেখা যায় না । ব্যবস্থা দেওয়া আপনকার জীবিকা ; কিন্তু, এ কথা সর্বত্র প্রচারিত হইলে, আপনকার জীবিকার হানি হইবেক । এই বলিয়া, বিদ্যাসাগর দণ্ডায়মান লোক গুলির দিকে চাহিয়া কহিলেন, আমি আপনাদের নিকট এই ভিক্ষা চাহিতেছি, আপনারা এ কথা কোথায়ও ব্যক্ত করিবেন না ; করিলে, ব্রাহ্মণের অন্ন মারা যাইবেক ।

ইহা কহিয়া, বিদ্যাসাগর বিদ্যারত্নকে বলিলেন, বিদ্যারত্ন মহাশয়, আপনিও কিছু লেখা পড়া শিখিয়াছেন, আমিও

কিছু শিখিয়াছি ; আপনি যদি পণ্ডিত বলিয়া পরিচয় দিতে পারেন, আমিও পারি । কিন্তু, ওরূপ পরিচয় দেওয়া দূরে থাকুক, যদি কেহ আমাকে ব্রাহ্মণ পণ্ডিত ভাবে, তাহাতে আমার যৎপরোনাস্তি অপমান বোধ হয় । বলিতে কি, আপনাদের আচরণের জন্যে, ব্রাহ্মণজাতির মান একবারে গিয়াছে । আর আপনকার বিদ্যা প্রকাশের প্রয়োজন নাই ; যথেষ্ট হইয়াছে ; স্বস্থানে প্রস্থান করুন । এই বলিয়া, বিদ্যাসাগর তাঁহাকে ও তাঁহার সমভিব্যাহারী মহাশয়দিগকে বিদায় করিয়া দিলেন । আমরাও সকলে, দেখিয়া শুনিয়া, অবাক্ হইয়া, চলিয়া গেলাম ।

নবদ্বীপ এ দেশের সৰ্ব্বপ্রধান সমাজ ; বিদ্যারত্ন সেই সৰ্ব্বপ্রধান সমাজের সৰ্ব্বপ্রধান স্মার্ত্ত বলিয়া গণ্য ও মান্য ; তাঁহার চাঁদমুখে স্বকর্ণে শুনিলাম, ব্যবস্থা দিবার সময়, বচন কখন দেখা যায় না । জানকীজীবন ন্যায়রত্ন যথাশাস্ত্র ব্যবস্থা দিয়াছিলেন । বিদ্যারত্ন খুড় পূর্বে ঐ ব্যবস্থায় নাম স্বাক্ষর করিয়াছেন ; কিন্তু, অপর পক্ষের নিকট হইতে, পছন্দমই তৈলবট হস্তগত করিয়া, আজ আবার ঐ ব্যবস্থা অব্যবস্থা বলিয়া প্রতিপন্ন করিতে প্ররত । এ দেশের মুখে ছাই, এ দেশের সৰ্ব্বপ্রধান সমাজের মুখে ছাই, এ দেশের সৰ্ব্বপ্রধান সমাজের সৰ্ব্বপ্রধান স্মার্ত্তের মুখে ফুল চন্দন । যাঁহাদের এরূপ ব্যবহার, তাঁহাদের সহিত কিরূপ ব্যবহার করা উচিত ও আবশ্যক, এ হতভাগা দেশের হতভাগা লোকের সে বোধও নাই, সে বিবেচনাও নাই ।

ইতি ঐত্রয়বিলাসে মহাকাব্যে কল্কচিৎ উপযুক্ত ভাইপোস্ত কৃতৌ

তৃতীয় উল্লাস ।

কিছু দিন হইল, নলডাঙ্গার চেঙনা রাজা বিধবার বিবাহ দিতে আরম্ভ করিয়াছেন । বিধবাবিবাহ শাস্ত্রনিষিদ্ধ কর্ম্ম ও দেশাচারবিরুদ্ধ ধর্ম্ম ; তিনি সে বিষয়ে হাত দিয়াছেন ; এজন্য, তাঁহাকে জব্দ করা আবশ্যক বিবেচনা করিয়া, শ্রীমতী যশোহরহিন্দুধর্ম্মরক্ষিণী সভার ধর্ম্মপরায়ণ বিচক্ষণ সভ্য মহোদয়েরা, নবদ্বীপের প্রধান স্মার্ত্ত শ্রীমান্ ব্রজনাথ বিদ্যারত্ন প্রভৃতি লম্বোদর খুড় মহাশয়দিগকে সভায় আহ্বান করিয়াছিলেন । বিদ্যারত্ন খুড়, বিধবাবিবাহ শাস্ত্রনিষিদ্ধ নহে, এই মর্মে এক ব্যবস্থা লিখিয়া, সমবেত সভ্যগণ সমক্ষে, পাঠ করিয়াছেন । ঐ ব্যবস্থা দেখিয়া, আমি যৎপরোনাস্তি আত্মলাদিত ও চমৎকৃত হইয়াছি । ব্যবস্থা দিবার সময় বচন ফচন দেখা যায় না, পূর্বে তাঁহার চাঁদমুখে এই যে অতি প্রশংসনীয় কমনীয় সাধু ভাষা শুনিয়াছিলাম, ঐ ব্যবস্থা সর্বাংশে তদনুযায়িনী হইয়াছে, ইহা দেখাইবার নিমিত্তই, আমার এই উদ্যোগ ও আড়ম্বর ।

সর্বপ্রধান সমাজের সর্বপ্রধান স্মার্ত্ত শ্রীমান্ বিদ্যারত্ন খুড়, বিধবাবিবাহ শাস্ত্রবিরুদ্ধ কর্ম্ম, ইহা প্রতিপন্ন করিবার নিমিত্ত, কোমর বাঁধিয়াছেন । এ বিষয়ে বিদ্যাভাগরের প্রচারিত পুস্তক খানি, একবার, মন দিয়া, আগাগোড়া দেখা তাঁহার পক্ষে নিতান্ত আবশ্যক ছিল । ইহা যথার্থ বটে, বিদ্যাভাগর, তাঁহাদের মত, বেহুদা পণ্ডিত নহেন ;

তঁাহাদের মত, বেয়াড়া ধর্মনিষ্ঠ নহেন ; ,তঁাহাদের মত, সাধুসমাজের অনুগত ও আজ্ঞানুবর্তী নহেন ; ,তঁাহাদের মত, সাধুসমাজের অভিমত নির্মল সনাতন ধর্মের রক্ষা বিষয়ে তৎপর ও অগ্রসর নহেন । এমন কি, পবিত্র সাধু-সমাজের প্রাতঃ স্মরণীয়, বহুদর্শী, বিচক্ষণ চাঁই মহোদয়েরা তঁাহাকে খৃষ্টান পর্য্যন্ত বলিয়া থাকেন । সুতরাং, তিনি শ্রীমান্ ত্রজনাথ বিদ্যারত্ন খুড় প্রভৃতি, সাধুসমাজে প্রতি-
ষ্ঠিত, মহামহোপাধ্যায়, মহাপুরুষদিগের সঙ্গে গণনীয় হইবার যোগ্য ব্যক্তি নহেন । কিন্তু, ইহাও দেখিতে ও শুনিতে পাওয়া যায়, বিদ্যাসাগর লিখিতে পড়িতে এক রকম বেস মজবুত ; যখন যাহা লিখেন, তাহা সহসা কেহ অগ্রাহ্য করিতে পারেন না । যাঁহাদিগকে সকলে, বাস্তবিক ভাল লোক বলিয়া, প্রশংসা করিয়া থাকেন, তাদৃশ পণ্ডিতগণের মুখে শত সহস্র বার শুনিয়াছি, বিদ্যাসাগর বিধবাবিবাহ বিষয়ে যে পুস্তক লিখিয়াছেন, তাহাতে দোষারোপ করিবার পথ নাই । বিদ্যারত্নের ব্যবস্থা দেখিয়া, স্পষ্ট প্রতীয়মান হই-
তেছে, ঐ অপবিত্র পুস্তক, কস্মিন্ কালেও, তঁাহার পবিত্র দৃষ্টিপথে পতিত হয় নাই । অথবা, তিনি সর্বপ্রধান সমা-
জের সর্বপ্রধান স্মার্ত্ত । স্মৃতি শাস্ত্রে তঁাহার অবিদিত কি আছে । সমুদায় স্মৃতি শাস্ত্র, তঁাহার দিব্য চক্ষুর উপর, সর্ব ক্ষণ, নৃত্য করিতেছে । এমন স্থলে, স্মৃতি শাস্ত্র সংক্রান্ত কোনও বিষয়ে, বিদ্যাপ্রকাশ আবশ্যক হইলে, বিদ্যাসাগ-
রের পুস্তক চুলায় যাউক, কোনও পুস্তক দেখিবার কোনও দরকার করে না । ধন্য সর্বপ্রধান সমাজ নবদ্বীপ ! ধন্য

ক্ষণজন্মা ব্রজনাথ ! ধন্য দেবহর্লভ বিদ্যারত্ন উপাধি !

আমি, এ যাত্রায়, শ্রীমান্ বিদ্যারত্ন খুড়র সঙ্গে রীতি-মত বিচার করিতে প্রবৃত্ত নহি। যদি কোনও মুখআলগা লোক, অগ্র পশ্চাৎ না ভাবিয়া, অগ্নান বদনে, বলিয়া বসেন, তবে তুমি ভয় পাইয়াছ। তাঁহার প্রতি আমার বক্তব্য এই, আমি বড় ডাঙপিটে, কোনও কারণে ভয় পাইবার ছেলে নই। উপযুক্ত ভাইপো, খুড়র সঙ্গে, বিচার করিতে পিছপাঁও হইবেন, যদি কেহ, ভুল ভ্রান্তিতেও, সেরূপ ভাবেন, তিনি যত বড় ধনী, যত বড় মামী, যত বড় বিদ্বান্, যত বড় বুদ্ধিমান্, যত বড় হাকিম, যত বড় আমলা, যত বড় তৈঁদড়া, যত বড় বেদড়া হউন না কেন, তাঁহার মনোহর গাল, বসরাই গোলাপের মত টুকটুকেই হউক, আর রামছাগলের মত চাঁপদাড়িতে স্নুসজ্জিত ও স্নুশোভিতই হউক, ঠাস ঠাস করিয়া, দশ বার জোড়া চড় মারিয়া, সেই বেআদবকে, চিরকালের জন্যে, ছুরস্ত করিয়া দিব। ইহার জন্যে যদি, শ্রীমতী যশোহরহিন্দুধর্ম্মরক্ষিণী সভাদেবীর সূক্ষ্ম বিচারে, ও অকাটা ফয়তা অনুসারে, ক্রমান্বয়ে ছয় মাস, ফাঁসি যাইতে হয়, তাহাও মঞ্জুর। আমি যে কেবল মুখে আশ্ফালন করিতেছি, কেহ যেন তাহা না ভাবেন। ইতিপূর্বে, শ্রীমান্ তর্কবাচস্পতি খুড়র সঙ্গে কেমন হুড়হুড়ি করেছি, তাহা কি আপনারা জানেন না, না কখনও শুনে নাই। এ যাত্রায়, খুড়র কাছে দুই চারিটি প্রশ্ন করিব। ঐ সকল প্রশ্নের উত্তর পাইলে, রীতিমত বিচারে প্রবৃত্ত হইব। যদি উপেক্ষা করিয়া, অথবা ভয়

পাইয়া, অথবা আর কোনও নিগূঢ় কারণের বশবর্তী হইয়া, খুড় মহাশয় উত্তর দানে বিমুখ হন, হুও হুও বলিয়া, হাততালি দিয়া, ইয়ারবর্গ লইয়া, কিয়ৎ ক্ষণ, আনন্দে নৃত্য করিব; পরে, রীতিমত বিচারে প্ররত্ত হইয়া, মড় মড় করিয়া, খুড়র ঘাড় ভাঙিয়া ফেলিব ।

যদি বলেন, খুড়র ঘাড় ভাঙিলে, খুড় মরিয়া যাইবেন । তাহার উত্তর এই, খুড়র ঘাড় বড় মজবুদ, সহজে ভাঙে, কার সাধ্য । আর, যদি ভাঙিয়াই যায়, তাহাতে আমি নাচার । আমি মনকে বুঝাইব, খুড়র কপালে লেখা ছিল, উপযুক্ত ভাইপোর হস্তে সন্নাতি হইবেক, তাহাই ঘটিয়াছে; বিধিনির্ধক অতিক্রম করে, কার সাধ্য । আর, ইহাও বুঝিয়া দেখা আবশ্যক, যদি, ভাগ্য ক্রমে, উপযুক্ত ভাইপোর চেষ্টা ও যত্নে, খুড়র সন্নাতি লাভ হয়, তাহাতে উভয়েরই প্রশংসা, উভয়েরই জন্ম সার্থক । যদি বলেন, খুড়র ঘাড় ভাঙিলে তোমার পাপ জন্মিবে । তাহার উত্তর এই, পাপের জন্ম আমার তত হুঁভাবনা নাই । এ দেশে কোন কর্ম করিলে, পাপস্পর্শ বা জাতিপাত ঘটিয়া থাকে । ছেলে বেলায়, ব্রাহ্মণ পণ্ডিতের এবং পবিত্র সাধুসমাজের বিচক্ষণ বহুদর্শী চাঁই মহোদয়দিগের মুখে, কখনও কখনও শুনিতাম, অপ্যেয়পান, অভক্ষ্যভক্ষণে, অগম্যাগমনে পাপস্পর্শ ও জাতিপাত হয় । এখন, সে সকল কথা ভণ্ডামি বা প্রতারণা, অথবা মিছা ভয় দেখান বা পরিহাস করা মাত্র বোধ হইতেছে । পাপজনক বা জাতিপাতকর হইলে, এ দেশের বিশুদ্ধ সাধুসমাজে, ঐ সকল কর্মের

অনুষ্ঠান বা অনুমোদন চর্য্যচক্রে দেখা যাইত না । সচরাচর দৃষ্ট হইতেছে, সুরাপানে পাপস্পর্শ ও জাতিপাত হইতেছে না ; সাহেবদের সঙ্গে খানা খাইলে, পাপস্পর্শ ও জাতিপাত হইতেছে না ; বিষয়াপন্ন লোকে, বাড়ীতে হাড়ি ও মুসলমান পাচক নিযুক্ত করিয়া, গোমাংস শূকরমাংস প্রভৃতি বিপুল বস্তু পাক করাইয়া খাইলে, পাপস্পর্শ ও জাতিপাত হইতেছে না ; বেশ্যালয়ে, মদ্য মাংস সেবন পূর্ব্বক, আমোদ আহ্লাদ করিয়া, রাত্রি কাটাইলে, পাপস্পর্শ ও জাতিপাত হইতেছে না । ফলকথা এই, এ দেশে অপেয়পানে, অভক্ষ্যভক্ষণে, অগম্যাগমনে পাপস্পর্শ ও জাতিপাত হয়, তাহার কোনও নজির বা নিদর্শন পাওয়া যায় না (১) । এমন স্থলে, উপযুক্ত ভাইপো খুড়র ঘাড় ভাঙিলে, পাপস্পর্শ বা জাতিপাত হইবেক, ইহা কোনও ক্রমে আমার অন্তঃকরণে লইতেছে না । যদিই, উপযুক্ত ভাইপোর কপালগুণে, খুড়র ঘাড় ভাঙিলে, পাপস্পর্শ ও জাতিপাত ঘটে, তাহার কি আর নিকৃতি নাই । খুড়র ঘাড় ভাঙিলে, হয় গোহত্যার, নয় ব্রহ্মহত্যার, পাতক হইবেক । শুনিয়াছি, এ উভয়েরই যথোপযুক্ত প্রায়শ্চিত্ত

(১) যদি বলেন, এ স্থলে তুমি মিথ্যা, প্রবঞ্চনা, প্রভারণা, জুয়াচুরি, বাটপাড়ি, জাল সাকী, জাল দলীল, জালৎমাকদ্দমা প্রভৃতির উল্লেখ করিলে না কেন । তাহার কারণ এই, ঐ সমস্ত, পবিত্র সাধুসমাজের নিরন্তর অনুষ্ঠান ও আন্তরিক অনুমোদন দ্বারা, বহু কাল হইল, সঙ্গাচার বলিয়া প্রতিষ্ঠিত হইয়া গিয়াছে । ঐ সকল সাধুসমাজসম্মত সঙ্গাচারকে যে অর্জাচীন নরাধম দোষ বলিয়া উল্লেখ করিবেক, তাহার ইহকালও নাই, পরকালও নাই । এ বিষয়ে আমি ক্রীমতী যশোহরহিন্দুধর্ম্মরক্ষিণী সভাদেবীকে সাক্ষিণী মান্য করিতেছি ।

বিধান আছে । যদিই স্পষ্ট বিধান না থাকে, বিদ্যাবাগীশ খুড় মহাশয়েরা চিরজীবী হউন, মনের মত তৈলকট সামনে ধরিলে, তাঁহারা একবারে অসামান ও দিগ্বিদিকজ্ঞান-শূন্য হইয়া পড়িবেন, এবং প্রফুল্ল চিত্তে, হয় বচন গড়িয়া, নয় মজুদ বচনের ঘাড় ভাঙিয়া, অম্লান বদনে, নিখরকিচ ব্যবস্থা লিখিয়া দিবেন ; তাহা হইলেই, সাধুসমাজে আর কোনও ওজর আপত্তি থাকিবেক না ।

এ স্থলে উল্লেখ করা নিতান্ত আবশ্যক, “এ দেশে কোন কর্ম করিলে, পাপস্পর্শ ও জাতিপাত হইয়া থাকে” ইতি-পূর্বে, সামান্যাকারে, •এই যে নির্দেশ করিয়াছি, তাহা প্রকৃত প্রস্তাবে ঠিক হয় নাই । কারণ, বিধবার বিবাহ দিলে, বিধবা বিবাহ করিলে, অথবা বিধবাবিবাহের সংশ্রবে থাকিলে, পাপস্পর্শ ও জাতিপাত হইয়া থাকে । এজন্যই, তাদৃশ ব্যক্তির পবিত্র সাধুসমাজে পরিগৃহীত হইতেছে না । সাধুসমাজ কাহাকে বলে, ঘটকচুড়ামণি শ্রীমান্ জনমেজয় বিদ্যাবাগীশ খুড়কে জিজ্ঞাসা করিলে, সবিশেষ জানিতে পারিবেন । যদি বলেন, ইনি কে । ইনি এক্ষণে শ্রীমতী যশোহরহিন্দুধর্ম্মরক্ষিণী সত্যদেবীর এক প্রধান নায়ক । আগে, ইঁহাকে, এক জন আধকামারিয়া উকীল বলিয়া জানিতাম ; এখন দেখিতেছি, ইনি সর্ব শাস্ত্রের অদ্বিতীয় ভুঁইকোঁড় মীমাংসাকর্ত্তা ; শ্রীমান্ ব্রজনাথ বিদ্যারত্ন, তথা শ্রীমান্ ভুবনমোহন বিদ্যারত্ন, তথা শ্রীমান্ রামধন তর্ক-পঞ্চানন প্রভৃতি প্রসিদ্ধ প্রাচীন খুড় মহাশয়েরা আর ইঁহা কাছে কলিকা পান না ।

কালে কিং বা ন দৃশ্যতে ।

কালে কিই বা না দেখা যায় ।

যাহা হউক, এই প্রশংসনীয় দেশের অতি প্রশংসনীয় সাধুসমাজের অভিমত, নিরতিশয় প্রশংসনীয়, নির্মল, সনাতন ধর্মের অপার মহিমা !!! বোধ করি, এমন নিরেট, টনটনিয়া, নিখিরকিচ ধর্ম ভূমণ্ডলে আর নাই। ইহার ক্ষমা-গুণ ও হজমশক্তি অতি অদ্ভুত। ইনি অপ্লেয়পান, অভক্ষ্য-ভক্ষণ, অগম্যাগমন প্রভৃতি অনায়াসে ক্ষমা করিতেছেন, হজম করিতেছেন। এইরূপ অদ্ভুতক্ষমতালশানী হইয়াও, কি কারণে ঠিক বলিতে পারি না, কেবল একটি অকিঞ্চিৎকর বিষয়ে, অর্থাৎ বিধবাবিবাহে, ইনি কিঞ্চিৎ অংশে দুর্বলতা ও অক্ষমতা দেখাইতেছেন। ইহাতে কেহ কেহ বলিতে পারেন, সাধুসমাজের অভিমত নির্মল সনাতন ধর্ম লোক ভাল, তার সন্দেহ নাই; কিন্তু, তিনি বড় পক্ষপাতী; পুরুষজাতির উপর, তিনি যত সদয়, স্ত্রীজাতির উপর, তিনি তত সদয় নহেন। আমার বিবেচনায় কিন্তু, তাঁহার উপর এ অপবাদ প্রবর্তিত হইতে পারে না। কারণ, তিনি স্ত্রীজাতির উপরেও বেয়াড়া সদয়। দিব্য চক্ষে ঘর ঘর দেখিয়া লও, তিনি স্ত্রীজাতির ব্যভিচার, জ্ঞানহত্যা, বেশ্যারূপে অবলম্বন প্রভৃতি, অকাণ্ডের, বিনা ওজরে, ক্ষমা করিতেছেন, হজম করিতেছেন। তবে, তাহাদের পুনর্বিবাহে যে যৎকিঞ্চিৎ গোলযোগ করিতেছেন, তাহা, ধরাধরি করিতে গেলে, একপ্রকার দোষের কথা বটে। আমি কিন্তু, এই 'সামান্য দোষ ধরিয়া, তাঁহার উপর

চটিতে চাহি না । কারণ, ইহা সৰ্ব্ববাদিসম্মত স্থির সিদ্ধান্ত, “এক আধারে সকল গুণ বৰ্ত্তে না” ; এবং, স্মৃতিসিদ্ধ বিচারসিদ্ধ কথাও আছে, “গাথা সকল ভার বহিতে পারেন, কেবল ভাতের কাঠিটি সহিতে পারেন না” । এই সমস্ত অনুধাবন করিয়া দেখিলে, সাধুসমাজের অতিমত নির্মল সনাতন ধর্মের এই আংশিক দুর্বলতা বা পক্ষপাতিতা দেখিয়া, অসন্তুষ্ট হওয়া কদাচ উচিত নহে । এ দেশের সাধুসমাজের সদ্বুদ্ধি, সদ্বিবেচনা, সংপ্রতি প্রভৃতির পূৰ্বাপর যেরূপ অপূৰ্ব পরিচয় পাওয়া বাইতেছে, এবং, সেই প্রশংসনীয় সাধুসমাজের অতিমত নির্মল সনাতন ধর্মের অপার মহিমা, অহরহঃ, যেরূপ প্রত্যক্ষ হইতেছে, তাহাতে এ উভয়কে মুক্তকণ্ঠে অকপট সাধুবাদ প্রদান করা সৰ্ব্বদেশীয় সৰ্ব্ববিধ ব্যক্তি মাত্রের সৰ্ব্বতোভাবে অবশ্যকর্তব্য কর্ম ; যিনি না করিবেন, তিনি, শ্রীমতী যশোহর-হিন্দুধর্মরক্ষিণী সতাদেবীর অকাট্য কয়তা অনুসারে, ধর্মদ্বারে পতিত হইবেন ।

যাঁহারা আমাকে জানেন, তাঁহারা মনে করেন, আমি বড় চতুর, চালাক, বুদ্ধিজীবী জন্তু । তাঁহারা কেন আমাকে ওরূপ ভাবেন, তাহা আমি ঠিক জানি না । বোধ হয়, আমি বড় ফাজিলচালাক, তাঁহাদের চক্ষে ধূলি প্রক্ষেপ করিয়া, অন্ধ করিয়া রাখিয়াছি, তাই তাঁহারা ওরূপ মনে করেন । স্পষ্ট কথা বলিতে গেলে, আমি, বিদ্যাবাগীশ খুড়দের মত, গদ্দভচুড়ামণি ; নতুবা, অকারণে, এত ফেচ ফেচ করিতেছি ও অগড়ম বগড়ম বকিতেছি কেন । অথবা, যাঁহারা এইরূপ

করেন, তাঁহারা, এ দেশের সাধুসমাজে, বড় আদরণীয় ও প্রসংশনীয় হন, ইহা দেখিয়া, বিষম লোভে পড়িয়া, অসামান্য হইয়া, এরূপ করিতে আরম্ভ করিয়াছি । শ্রীল শ্রীযুক্ত ঘটকচূড়ামনি জনমেজয় বিদ্যাবাগীশ খুড় মহাশয় এ বিষয়ের জাজ্বল্যমান জলজিয়ন্ত দৃষ্টান্ত । এই খুড় মহাশয়, বিধবাবিবাহের অশাস্ত্রীয়তা ও অযৌক্তিকতা বিষয়ে, এক বিচিত্র বক্তৃতা লিখিয়া, শ্রীমতী যশোহরহিন্দুধর্ম্মরক্ষিণী সভাদেবীর চতুর্থ সাংবৎসরিক অধিবেশনে, পাঠ করিয়াছেন । সভাস্থ মহামহোপাধ্যায় বিদ্যাবাগীশের পাল, ঐ বক্তৃতা শ্রবণে মাত হইয়া, ঘটকচূড়ামনিকে শত শত বার ধন্যবাদ ও কপিরত্ন (১) এই উপাধি দিয়াছেন ; এবং শ্রীমতী সভাদেবীও, প্রিয়তম নায়কের বক্তৃতারসে গলিয়া গিয়া, দেশের ধর্ম্মরক্ষার দোহাই দিয়া, ঐ অদ্ভুত বক্তৃতা পুস্তকাকারে মুদ্রিত ও প্রচারিত করিয়াছেন । দেখুন, শ্রীমান্ জনমেজয় খুড় মহাশয়, ধর্ম্মশাস্ত্র বিষয়ে, বর্ণজ্ঞানানবচ্ছিন্ন হইয়াও, নিরবচ্ছিন্ন ফেচ ফেচ ও ফাজিলচালাকি করিয়া, কেমন ধন্যবাদ মারিয়াছেন । ইহা দেখিয়া, লোভ সংবরণ করা, যাহাদের ফাজিলচালাকি করা রোগ আছে, তাহাদের পক্ষে, সহজ ব্যাপার নহে । ধন্যবাদের বাজার এত সম্ভা দেখিয়া, কেইবা ফেচ ফেচ ও ফাজিলচালাকি করিতে ছাড়িবেক ।

যাহা হউক, এরূপ চমৎকারিণী, চিত্তহারিণী বক্তৃতার সমুচিত সমালোচনা হওয়া, সর্ব্বতোভাবে, উচিত ও আব-

শ্যক । কিন্তু, এই বিদকুটে সমালোচনা যার তার কর্ম্য নহে । যেমন গ্রন্থকর্তা, তেমনই সমালোচক চাই । যেমন বুন্দা ওল, তেমনই বাঘা তেঁতুল, অথবা, সাধুভাষায় বলিতে গেলে, যেমন কুকুর তেমনই মুগুর, না হইলে, বিশিষ্টরূপ ফলদায়ক হইয়া উঠে না । ফলকথা এই, আমার মত কাজিল-চালাক, হুঁসিয়ার ছোকরা ভিন্ন, অন্য কোনও মহামহো-পাধ্যায় এই গ্রন্থের, প্রকৃত প্রস্তাবে, সমালোচনা করিতে পারিবেন, ইহা কোনও মতে সম্ভব নহে । সুতরাং, অগত্যা, আমাকেই এই গ্রন্থের সমালোচনা ত্রুতে দীক্ষিত হইতে হইবেক । ইহাতে আমি কিছুমাত্র ক্লেশ বোধ বা লোকমান জ্ঞান করিব না ; কারণ, এই অপূর্ব গ্রন্থের সমালোচনায় প্রবৃত্ত হইলে, যত মজা, যত আমোদ পাইব, বোধ হয়, এ জন্মে আর আমার ভাগ্যে সেরূপ ঘটা সম্ভব নহে । শ্রীমান্ বিদ্যারত্ন খুড়র নিকট যে কয়টি প্রশ্ন করিতেছি, ঐ সকল প্রশ্নের উত্তর পাইলেই, এক ক্ষুরে দুই খুড়র মাথা মুড়াইব ; কারণ, দুই খুড়রই বিদ্যাপ্রকাশ একই রকমের ; অর্থাৎ, এ পিঠ ও পিঠ দুই পিঠ সমান । সুতরাং, এক উদ্যোগেই, উভয় খুড়র সম্মান ও সন্নাতিদান হইবেক, স্বতন্ত্র অনুষ্ঠানের প্রয়োজন থাকিবেক না ।

তেনৈবচ সপিঞ্চবৎ তেনৈবান্দিকমিষ্যতে ।

এক অনুষ্ঠানেই সপিণ্ডীকরণ ও একোদ্দিষ্ট সম্পন্ন হইয়া যায় ।

ইতি জীবজবিলাসে মহাকাব্যে কশ্যচিৎ উপযুক্ত ভাইপোস্ত কৃতৌ

তৃতীয় উল্লাসঃ ।

চতুর্থ উল্লাস ।

শ্রীমান্ নদিয়ার চাঁদ ব্রজনাথ বিদ্যারত্ন খুড় মহাশয়, শ্রীমতী যশোহরহিন্দুধর্ম্মরক্ষিণী সভায় আহূত হইয়া, বিধবাবিবাহ সম্বন্ধে যে বক্তৃতা লিখিয়া, সমবেত সমস্ত সভ্যগণের, ও রবাহৃত তামাসাগির বহুসংখ্যক দর্শকগণের, সমক্ষে পাঠ করিয়াছেন, ও তদুপলক্ষে বেধড়ক ধন্যবাদ পাইয়াছেন, তাহার আরম্ভ ভাগ ও উপসংহার ভাগ মাত্র আপাততঃ আলোচিত হইতেছে । এই দুই অংশই তাঁহার বক্তৃতার সারভাগ ; মধ্যবর্ত্তী অংশে কেবল ফেচ ফেচ, কাজিল-চালাকি, ও স্মৃতিশাস্ত্রে যে কিছু মাত্র বোধ ও অধিকার নাই, তাহার অসম্বন্ধ প্রমাণ প্রদর্শন করিয়াছেন ; এ জন্য, অনাবশ্যক বিবেচনায়, সে অংশের আলোচনা এ বৈঠকে মুলতুবি রাখা গেল । পরে, ইস্তাহার দ্বারা সময় নির্দ্ধারিত করিয়া, সে অংশেরও, মাকিক আইন, বিচার পূর্ব্বক, চূড়ান্ত হুকুম দেওয়া যাইবেক ।

আরম্ভ ভাগ ।

“সকৃদংশো নিপততি সকৃৎ কন্যা প্রদীয়তে ।

সকৃদাহ দদানীতি ত্রীণ্যেতানি সতাং সকৃৎ ॥

ইত্যনেন মনুনা সকৃদানবিধানাং বিহিতদানোত্তরগ্রহণস্যেব
বিবাহপদার্থত্বাং সূতরাং পুনর্বিবাহোহসম্ভব ইতি ।”

বিষয়বিভাগ এক বার হয়, কন্যাদান এক বার হয়, দিলাম এই বাক্য
প্রয়োগ এক বার হয় ; এই তিন সাধুদের এক বার । এই বচনে মনু

এক বার দানের বিধি দিয়াছেন এবং যথাবিধি দানের পর যে গ্রহণ
তাহাই বিবাহশব্দবাচ্য, সুতরাং পুনর্ব্বার বিবাহ অসম্ভব ।

ইহার তাৎপর্য্য এই, মনু এক বার মাত্র কন্যাদানের
বিধি দিয়াছেন ; সুতরাং, এক বার কন্যা দান করিলে, সে
কন্যার পুনরায় আর দান হইতে পারে না । কন্যাকর্ত্তা
যথাবিধি কন্যার দান করেন, সেই দানের পর, বর যথাবিধি
কন্যার যে গ্রহণ করেন, তাহারই নাম বিবাহ । সুতরাং,
এইরূপ যথাবিধি দান ও যথাবিধি গ্রহণ ব্যতিরেকে,
স্ত্রী পুরুষের যে মিলন, তাহা বিবাহ বলিয়া পরিগৃহীত
নহে । যখন, এক বার কন্যাদান করিলে, সে কন্যার পুনরায়
আর দান হইতে পারে না, তখন বিবাহিতা কন্যার পুনর্ব্বার
বিবাহ কোনও মতে সম্ভবিত্তে পারে না ।

বিদ্যারত্ন খুড় মহাশয় এ দেশের সৰ্ব্বপ্রধান সমাজের
সৰ্ব্বপ্রধান স্মার্ত্ত ; সুতরাং, এক্ষণে, স্মৃতিশাস্ত্রের সৰ্ব্বপ্রধান
মীমাংসাকর্ত্তা । তাঁহার চাঁদমুখ বা স্বর্ণময়ী লেখনী হইতে,
যখন যাহা বহির্গত হয়, তাহাই, বেদবাক্যের ন্যায়, অশ্রান্ত
ও অকাট্য, সে বিষয়ে এক পরসারও, এক কানা কড়িরও,
সন্দেহ নাই । তাঁহার মীমাংসাতে দোষারোপ করিতে উদ্যত
হওয়া অতি বড় আশ্চর্য্যের কথা, ও অতি বড় মহাপাতকের
কর্ম্ম, তাহারও কোনও সন্দেহ নাই । এজন্য, কেহ, সাহস
করিয়া সে বিষয়ে অগ্রসর হইতে পারেন না । কিন্তু, উপযুক্ত
ভাইপোর সঙ্গে, খুড় মহাশয়ের যেরূপ পবিত্র সম্পর্ক,
তাহাতে উপযুক্ত ভাইপো খুড়ের মীমাংসা লইয়া যৎকিঞ্চিৎ
আমোদ আশ্লাদ করিলে, সাধুসমাজে অপদম্ব বা নিন্দার

বিধি পূর্বক কন্যার যে গ্রহণ, তাহাকেই বিবাহ বলে । সুতরাং, যেখানে এ উভয়ের অসম্মতাব, অর্থাৎ বিধি পূর্বক দান ও গ্রহণ নাই, সে স্থলে বিবাহ শব্দ প্রযুক্ত হইতে পারে না ।

বিবাহ অষ্টবিধ ; ব্রাহ্ম, দৈব, আর্ষ, প্রাজাপত্য, আশুর, গান্ধর্ব, রাক্ষস, পৈশাচ (৩) । যে স্থলে, কন্যাকে, যথাশক্তি বস্ত্রালঙ্কারে ভূষিতা করিয়া, স্বয়ং আহ্বান পূর্বক, সৎপাত্রের দান করা যায়, তাহার নাম ব্রাহ্ম বিবাহ (৪) । যে স্থলে, কন্যাকে, যথাশক্তি বস্ত্রালঙ্কারে ভূষিতা করিয়া, যজ্ঞ ক্ষেত্রে যজ্ঞানুষ্ঠানব্যাপ্ত ব্যক্তিকে, দান করা যায়, তাহার নাম দৈব বিবাহ (৫) । যে স্থলে, বরের নিকট হইতে গো-যুগল গ্রহণ করিয়া, কন্যাদান করা যায়, তাহার নাম আর্ষ বিবাহ (৬) । যে স্থলে, উভয়ে মিলিয়া ধর্মের অনুষ্ঠান কর, ইহা কহিয়া, বিবাহার্থী ব্যক্তিকে কন্যাদান করা যায়, তাহার নাম প্রাজাপত্য বিবাহ (৭) । যে স্থলে, বরপক্ষের নিকট হইতে ধন গ্রহণ পূর্বক, কন্যাদান করা যায়, তাহার নাম আশুর বিবাহ (৮) । যে স্থলে, বর ও কন্যা, পরস্পর

(৩) ব্রাহ্মো দৈববস্ত্রৈর্বার্ষঃ প্রাজাপত্যশুখাসুরঃ ।

গান্ধর্বো রাক্ষসশ্চৈব পৈশাচশ্চান্দ্রমোহধমঃ ॥ মনু । ৩ । ২১ ।

(৪) ব্রাহ্মো বিবাহ আশুর দীযতে শক্তালঙ্কৃত । যাজ্ঞবল্ক্য । ১ । ৫৮ ।

(৫) যজ্ঞস্থায়িত্বিজে দৈবঃ । যাজ্ঞবল্ক্য । ১ । ৫৯ ।

(৬) আদ্যার্বস্ত গোধরম্ । যাজ্ঞবল্ক্য । ১ । ৬০ ।

(৭) ইত্যুক্তা চরতাং ধর্মং সহ যা দীযতে হর্ষিণে । স কাশঃ । যাজ্ঞ-
বল্ক্য । ১ । ৬০ ।

(৮) আশুরো জম্বিনাদানাং । যাজ্ঞবল্ক্য । ১ । ৬১ ।

অনুরাগ বশতঃ, আপন ইচ্ছা অনুসারে, দম্পতিভাবে মিলিত হয়, তাহার নাম গান্ধর্ব্ব বিবাহ (৯)। যে স্থলে, কন্যার কর্তৃপক্ষকে যুদ্ধে পরাস্ত করিয়া, বল পূর্ব্বক কন্যাহরণ করে, তাহার নাম রাক্ষস বিবাহ (১০)। যে স্থলে, ছল পূর্ব্বক কন্যাহরণ করে, তাহার নাম পৈশাচ বিবাহ (১১)।

এক্ষণে, খুড় মহাশয়ের নিকট প্রশ্ন এই, যথাবিধি দানের পর যে গ্রহণ, তাহাই বিবাহশব্দবাচ্য, তাহার নির্দ্ধারিত এই বিবাহের লক্ষণ গান্ধর্ব্ব, রাক্ষস, পৈশাচ, এই তিন বিবাহে খাটিতেছে কি না। গান্ধর্ব্ব বিবাহ, বর ও কন্যার স্বেচ্ছাতে, সম্পন্ন হইয়া থাকে, তাহাতে দান ও গ্রহণের কোনও সংশ্রব নাই ; দাই যুদ্ধাই রাজি, কি করিবে কাজি ; বর কন্যায় রাজি হইয়া, কাজ শেষ করিলে, বাপের আর চালাকি করিবার দরকার থাকিতেছে না। কন্যার কর্তৃপক্ষকে যুদ্ধে পরাস্ত করিয়া, বল পূর্ব্বক কন্যাহরণের নাম রাক্ষস বিবাহ ; ছল পূর্ব্বক কন্যাহরণের নাম পৈশাচ বিবাহ ; এই দুই স্থলে, দান ও গ্রহণের সম্ভাবনাই নাই। সুতরাং, যথাবিধি দানের পর যে গ্রহণ, তাহাই বিবাহ-শব্দবাচ্য, এই লক্ষণ ঐ তিন-বিবাহে খাটা অসম্ভব বোধ হইতেছে। যদি না খাটে, তবে মনু প্রভৃতি ধর্ম্মশাস্ত্রকর্ত্তারা যে এই তিনকে বিবাহ বলিয়া নির্দেশ করিয়াছেন, তাহা কিরূপে সংগত হয় ; এবং, ব্যবস্থা দিবার সময় বচন

(৯) গান্ধর্ব্বঃ সময়াগ্নিধঃ । বাজবল্ক্য । ১ । ৬১ ।

(১০) রাক্ষসো যুদ্ধহরণাৎ । ১ । ৬১ । , ,

(১১) পৈশাচঃ কন্যাকাঙ্ক্ষাৎ । বাজবল্ক্য । ১ । ৬১ ।

কচন দেখা যায় না, এই কবুলের আর একটি নজির খাড়া হয় কি না ।

উপসংহার ভাগ ।

“যদি চাপরিতোষো বিদুষাং তদা পরাশরবচনং বাগ্দত্তা-
বিষয়মিতি অত্রায়ম্ভাবঃ যস্মৈ বাগ্দানং কৃতং তস্মিন্ বিদেশ-
গতে মৃত্যুতে পতিতে প্রব্রজিতে ক্রীবে চ স্ত্রীণাং মহতী বিপ-
দেব সম্ভবতি তৎ কারণং শ্রয়তাম্, অজাতবিদেশগমনাদি-
দশায়াং যেভ্যো বাগ্দানং কৃতং তেষু বিদেশাদিগতেষু
অনন্তগতিকানাং তাদৃশস্ত্রীণাং বিবাহুং বিনা তাদৃশবিপ-
দুদ্ধারঃ কদাপি ন সম্ভবতি, বাচা দন্তেতি কাশ্যপবচনেন
বাগ্দত্তাদীনাং স্ত্রীণাং বিবাহকরণে নিন্দাশ্রবণাং তৎপরি-
ণয়নে কেষামপি প্রবৃ্ত্তির্ন স্যাৎ অতঃ সম্পূর্ণা আপদুপস্থিতা ।
তত্রৈব পরাশরবচনং প্রতিপ্রসববিধায়কং নতু বিবাহিতায়াঃ
পুনর্বিবাহবিধায়কং তথাত্তে প্রাপ্তজন্মহাদিবচনবিরোধো-
পস্থিরিতি” ।

ইহাতে যদি পণ্ডিতগণের পরিতোষ না জন্মে, তবে পরাশরবচন
বাগ্দত্তা কল্পার বিষয়ে । ইহার অভিপ্রায় এই, যে ব্যক্তিকে কল্পার
বাগ্দান করা গিয়াছে, সে বিদেশগত, মৃত, পতিত, প্রব্রজিত, ও
ক্রীব স্থির হইলে, স্ত্রীদিগের বড়ই বিপদ ঘটে । তাহার কারণ শুন,
যে সময়ে বিদেশগমনাদি ঘটে নাই, তখন তাহাদিগকে কল্পার বাগ্দান
করা হয়, তাহারা বিদেশাদিগত হইলে, অনন্তগতি তাদৃশ স্ত্রীদিগের
বিবাহ ব্যতিরেকে তাদৃশ বিপদুদ্ধার কদাপি সম্ভবে না । বাচা দন্তা এই
কাশ্যপবচনে বাগ্দত্তা প্রভৃতি স্ত্রীদিগের বিবাহকরণে নিন্দাকীৰ্ত্তন আছে,
তজ্জন্ম তাহাদিগকে বিবাহ করিতে কাহারও প্রবৃ্ত্তি না হইতে পারে,
সুতরাং সম্পূর্ণ আপদ উপস্থিত, পরাশরবচন এই বিষয়েই বিশেষ

বিধি হইতেছে, বিবাহিতার পুনর্ব্বার বিবাহের শিবিদায়ক নহে ;

সে রূপ হইলে, পূর্ব্বোক্ত মনু প্রভৃতির বচনের সহিত বিরোধ ঘটে ।

শ্রীমান্ বিদ্যারত্ন খুড়র সিদ্ধান্ত এই, পরাশরের বিবাহ-বিধি বাগদত্তা কন্যার বিষয়ে, অর্থাৎ বাগদত্তা কন্যার বর বিদেশগত, মৃত, পতিত, প্রব্রজিত ও ক্লীব স্থির হইলে, সেই কন্যার অন্য পাত্রের সহিত বিবাহ হইতে পারিবেক, পরাশর এই বিধি দিয়াছেন ; বিবাহিতা কন্যার পুনর্ব্বার বিবাহ তাঁহার অভিমত নহে ।

খুড় মহাশয়ের চাঁদমুখ হইতে যখন যে কয়তা নির্গত হয়, তাহাই অভ্রান্ত ও অকাট্য ; দোষের মধ্যে, ব্যবস্থা দিবার সময় বচন কখন দেখা যায় না, তদীয় এই কবুলের এক একটি নজির খাড়া হইয়া পড়ে ।

তৃতীয় প্রশ্ন ।

নষ্টে মৃতে প্রব্রজিতে ক্লীবে চ পতিতে পতৌ ।

পঞ্চম্বাপংসু নারীণাং পতিরন্তো বিধীয়তে ॥

অষ্টৌ বর্ষাণ্যপেক্ষেত ব্রাহ্মণী প্রোষিতং পতিম্ ।

অপ্রসূতা তু চত্বারি পরতোহন্যং সমাশ্রয়েৎ ॥

কজ্জিয়া ঘটনমাস্তিষ্ঠেদপ্রসূতা সমাত্রয়ম্ ।

বৈশ্যা প্রসূতা চত্বারি দ্বৈ বর্ষে ত্বিতরা বসেৎ ॥

ন শূদ্রায়াঃ স্মৃতঃ কাল এষ প্রোষিতযোষিতাম্ ।

জীবতি ঞ্জয়মাণে তু স্তাদেষ দ্বিগুণো বিধিঃ ॥

অপ্রবর্তৌ তু ভূতানাং দৃষ্টিয়েষা প্রজাপতেঃ ।

অতোহন্যগমনে স্ত্রীণামেষু দোষো ন বিজ্ঞতে (১) ॥

স্বামী অনুদেশ হইলে, মরিলে, সংসারধর্ম্ম পরিত্যাগ করিলে, ক্লীব

স্থির হইলে, অথবা পতিত হইলে, জ্বীদিগের পুনর্বিবাহ শাস্ত্র-
বিহিত। স্বামী অনুদ্দেশ হইলে, ব্রাহ্মণজাতীয়া জ্বী আট বৎসর প্রতীক্ষা
করিলে; যদি সন্তান না হইয়া থাকে, তবে চারি বৎসর; তৎপরে
বিবাহ করিলে। ক্ষত্রিয়জাতীয়া জ্বী ছয় বৎসর প্রতীক্ষা করিলে; যদি
সন্তান না হইয়া থাকে, তবে তিন বৎসর। বৈশ্যজাতীয়া জ্বী, যদি
সন্তান না হইয়া থাকে, চারি বৎসর, নতুবা দুই বৎসর। শূদ্রজাতীয়া
জ্বীর প্রতীক্ষার কালনিয়ম নাই। অনুদ্দেশ হইলেও, যদি জীবিত
আছে বলিয়া শুনিতে পাওয়া যায়, তাহা হইলে পূর্বোক্ত কালের দ্বিগুণ
কাল প্রতীক্ষা করিলে। কোনও সংবাদ না পাইলে, পূর্বোক্ত কাল-
নিয়ম। প্রজাপতি ব্রহ্মার এই মত। অতএব, এই কয় স্থলে, জ্বীদিগের
পুনর্বিবাহ দোষাবহ নহে।

নারদসংহিতার এই অংশ খুড় মহাশয়ের দিব্য চক্ষুর গোচর
হইলে, তিনি, নষ্টে যুতে প্রব্রজিতে, এই বচন বাগদত্তা-
বিষয়ক বলিয়া, অভ্রান্ত, অকাট্য সিদ্ধান্ত করিতে অগ্রসর
হইতেন, এরূপ বোধ হয় না। কারণ, যদি এই বচন
বাগদত্তাবিষয়ক হইত, তাহা হইলে, অনুদ্দেশ স্থলে, সন্তান
হইলে এক প্রকার কালনিয়ম, সন্তান না হইলে আর
এক প্রকার কালনিয়ম, কিরূপে সঙ্গত হইতে পারে।
অতএব, খুড় মহাশয়ের নিকট প্রশ্ন এই, পরাশরবচন
বাগদত্তা বিষয়ে ব্যবস্থাপিত হইলে, নারদসংহিতার সহিত
বিরোধ ঘটে কি না।

চতুর্থ প্রশ্ন ।

শ্রীমান্ বিদ্যারত্ন খুড়র নিকট আর একটি প্রশ্ন এই;
যে ব্যক্তিকে কন্যার বাগদান করা যায়, সে সগোত্র,
চিররোগী, বধেচ্ছারী, অন্যজাতীয় প্রভৃতি স্থির হইলে,

ঐ বাগদত্তা কন্যার কিরূপ গতি হইবেক । কারণ, খুড়র সিদ্ধান্ত এই, পরাশর বাগদত্তা কন্যার পক্ষে, বর বিদেশ-গত, মৃত, পতিত, প্রত্নজিত ও ক্লীব স্থির হইলে, বিবাহের বিধি দিয়াছেন । যখন, ঐ পাঁচটি স্থল ধরিয়া, বাগদত্তা কন্যার পক্ষে, বিবাহের বিধি দেওয়া হইয়াছে; তখন, তদ্বিত্ত স্থলে, কি রূপে বাগদত্তা কন্যার বিবাহ হইতে পারে । মনে কর, কেহ, সজাতীয় স্থির করিয়া, কোনও ব্যক্তিকে কন্যার বাগদান করিয়াছে; পরে জানা গেল, সে ব্যক্তি অন্য-জাতীয়; এক্ষণে, ঐ বাগদত্তা কন্যাকে সেই অন্যজাতীয় পাত্র দেওয়া যাইবেক, বা সজাতীয় অন্য পাত্র স্থির করিয়া, তাহার সহিত বিবাহ দেওয়া যাইবেক, অথবা খুড় মহাশয়ের অভ্রান্ত সিদ্ধান্ত অনুসারে, বাগদত্তা কন্যাকে যে পাঁচ স্থলে অন্য পাত্র দিবার বিধি আছে, এ সে পাঁচের অন্তর্গত স্থল নহে; সুতরাং, তাহার আর বিবাহ হইবার পথ নাই; এজন্য, তাহাকে যাবজ্জীবন ব্রহ্মচর্য্য করিতে হইবেক । ঐই সন্দেহভঞ্নের জন্য, খুড় মহাশয়ের নিকট, ঐই লক্ষ্মীছাড়া প্রশ্নটি অগত্যা উপস্থিত করিতে হইল ।

পঞ্চম প্রশ্ন ।

বাচাদভেতি কাশ্যপবচনেন বাগদত্তাদীনাং স্ত্রীণাং বিবাহ-করণে নিন্দাশ্রবণাং তৎপরিণয়নে কেষামপি প্রসুতিন্ স্যাৎ অতঃ সম্পূর্ণা আপদুপস্থিতা তত্শ্চৈব পরাশরবচনং প্রতি-প্রসববিধায়কম্ ।

বাচাদত্তা ঐ কাশ্যপবচনে বাগদত্তা প্রভৃতি স্ত্রীদিগের বিবাহকরণে নিন্দাকীৰ্ত্তন আছে, এজন্য তাহাদিগকে বিবাহ করিতে কাহারও

প্রভৃতি না হইতে পারে, সুতরাং সম্পূর্ণ আপদ উপস্থিত । পরাশর-
বচন হইতেই বিষয়েই বিশেষবিধি হইতেছে ।

খুড় মহাশয়ের উপসংহার ভাগের এই অংশটি দেখিয়া,
আমার সন্দেহ হইতেছে, যখন আসরে নাগিব, তোমাদের
হইয়াই নাচিব ও গাইব, এই আশয় দিয়া, নলডাঙ্গার
চেঙনা বাহাদুরের নিকট হইতে, তৈলবট লওয়া হইয়াছে ।
যাহা লিখিয়াছেন, তাহা দ্বারা, কৌশল করিয়া, তাঁতিকুল,
বৈষ্ণবকুল, উভয় রক্ষা করা হইয়াছে । প্রথমতঃ, বিধবা-
বিবাহ শাস্ত্রবিরুদ্ধ ও অসম্ভব, এইরূপ লিখিয়া, শ্রীমতী
যশোহরহিন্দুধর্ম্মরক্ষিণী সভাদেবীর মন রাখিয়াছেন ; আর,
উপরি নির্দিষ্ট অংশটুকু লিখিয়া, নলডাঙ্গার চেঙনা
বাহাদুরের মান রাখিয়াছেন । এক্ষণে, স্পষ্ট প্রতীয়মান
হইতেছে, বিধবার বিবাহপক্ষে শ্রীমান্ বিদ্যারত্ন খুড়র
সম্পূর্ণ আন্তরিক টান আছে, অন্য পক্ষে কেবল মৌখিক ।
কারণ, বিবাহের পক্ষে যাহা লিখিয়াছেন, তাহা অকাট্য ;
বিবাহের বিপক্ষে যাহা লিখিয়াছেন, তাহা টেকসই নয় ।
পরাশরবচন বাগদত্তা কন্যার বিষয়ে, এই যে কথা বলিয়া-
ছেন, সে ছেলেখেলা মাত্র ; কারণ, এ দিকের চন্দ্র ও
দিকে উঠিলেও, পরাশরবচন বাগদত্তাবিষয়ক, ইহা কদাচ
সাব্যস্ত হইবার নহে । আর, এ দিকে, কাশ্যপবচনে বাগদত্তা
প্রভৃতি স্ত্রীদিগের বিবাহের যে নিষেধ আছে, সেই নিষেধ
রহিত করিয়া, পরাশর বিবাহের বিধি দিয়াছেন, এই যে
নির্দেশ করিয়াছেন, ইহা অকাট্য । নলডাঙ্গার চেঙনা
বাহাদুরকে, প্রথমতঃ, লক্ষ্মীছাড়া ও বক্শের ঠাইরাইয়া-

ছিলাম ; এক্ষণে দেখিতেছি, ইনি এক জন খুব তুখড়
সিয়ান ছোকরা । বিদ্যারত্ন খুড়কে হাত করিয়া, ভিতরে
ভিতরে কেমন কাজ গুছাইয়া লইয়াছেন । অথবা, তিনি
দেখিতে যেরূপ শিষ্ট ও শান্তপ্রকৃতি, তাহাতে এটি তাঁহার
বুদ্ধির খেলা বলিয়া বোধ হয় না । মজুমদার বলিয়া তাঁহার
যে একটি বেদড়া মন্ত্রী আছেন, এটি তাঁরই তেঁদড়ামি ।

অমায়িক, উদারচিত্ত, শ্রীমান্ বিদ্যারত্ন খুড় মহাশয়
লিখিয়াছেন, কাশ্যপবচনে বাগদত্তা প্রভৃতি স্ত্রীদিগের
বিবাহে নিন্দাকীর্তন আছে ; সুতরাং, কেহ তাহাদিগকে
বিবাহ করিতে সম্মত হইবেক না ; পরাশর সেই বিষয়েই
বিশেষ বিধি দিয়াছেন ; অর্থাৎ, বাগদত্তা প্রভৃতির বর
ক্লীব প্রভৃতি স্থির হইলে, তাহাদের পুনর্ব্বার বিবাহ হইতে
পারিবেক, পরাশর এই বিধি দিয়াছেন । খুড় মহাশয়ের
উল্লিখিত কাশ্যপবচন এই ;—

সপ্ত পৌনর্ভবাঃ কন্যা বর্জনীয়াঃ কুলাধমাঃ ।

বাচাদত্তা মনোদত্তা কৃতকৌতুকমঙ্গলা ॥

উদকম্পর্শিতা যা চ যা চ পানিগৃহীতিকা ।

অগ্নিং পরিগতা যা চ পুনর্ভুপ্রভবা চ যা ।

ইত্যেতাঃ কাশ্যপেনোক্তা দহন্তি কুলমগ্নিবৎ (২) ॥

বাচাদত্তা অর্থাৎ বাক্য দ্বারা তাহাকে দান করা গিয়াছে, মনোদত্তা
অর্থাৎ মনে মনে তাহাকে দান করা গিয়াছে, কৃতকৌতুকমঙ্গলা
অর্থাৎ যাহার হস্তে বিবাহসূত্র বন্ধন করা গিয়াছে, উদকম্পর্শিতা
অর্থাৎ তাহাকে যথাবিধি দান করা গিয়াছে, পানিগৃহীতিকা অর্থাৎ

যাহার পাণিগ্রহণ যথাবিধি সম্পন্ন হইয়াছে, অগ্নিঃ পরিগতা অর্থাৎ যাহার কুশণ্ডিকা যথাবিধি নিষ্পন্ন হইয়াছে, পুনভূপ্রভবা অর্থাৎ পুনভূর গর্ভে যাহাব জন্ম হইয়াছে ; কুলের অধম এই সাত পৌনর্ভব কন্যা বর্জন করিবেক । এই সাত কাশ্যপোক্তা কন্যা, বিবাহিতা হইলে, অগ্নিব স্তায়, কুল দগ্ধ করে ।

খুড় মহাশয়ের মীমাংসা অনুসারে, এই কাশ্যপবচনে যাহাদের বিবাহ নিষিদ্ধ ও নিষিদ্ধ হইয়াছিল, পরাশর, অনুদ্দেশ প্রভৃতি পাঁচ স্থলে, তাহাদের বিবাহের বিধি দিয়াছেন । সুতরাং, অনুদ্দেশ প্রভৃতি পাঁচ স্থলে, বাচা-দত্তা, মনোদত্তা, ক্লতকৌতুকমঙ্গলা, উদকস্পর্শিতা, পাণি-গৃহীতিকা, অগ্নিঃ পরিগতা, পুনভূপ্রভবা, এই সাত প্রকার কন্যার বিবাহ বিধিসিদ্ধ হইতেছে । তন্মধ্যে, উদকস্পর্শিতা অর্থাৎ যাহাকে যথাবিধি দান করা গিয়াছে, পাণিগৃহী-তিকা অর্থাৎ যাহার পাণিগ্রহণ যথাবিধি সম্পন্ন হইয়াছে, অগ্নিঃ পরিগতা অর্থাৎ যাহার কুশণ্ডিকা যথাবিধি নিষ্পন্ন হইয়াছে, এই তিন কন্যাকে বিবাহিতা বলিয়া গণ্য করিতে হইবেক । এই তিন কন্যার পতি মৃত, পতিত, প্রব্রজিত প্রভৃতি স্থির হইলে, খুড় মহাশয়ের মীমাংসা অনুসারে, পরাশরের বিশেষবিধির বলে, তাহাদের বিবাহ হইতে পারিতেছে । সুতরাং, বিদ্যাসাগরের ব্যবস্থার সহিত, খুড় মহাশয়ের মীমাংসার, আর কোনও অংশে, অণুমাত্র প্রভেদ বা বৈলক্ষণ্য থাকিতেছে না । এক্ষণে সকলে দেখুন, খুড় মহাশয়, কেমন চালাকি খেলিয়াছেন ; শ্রীমতী যশোহরহিন্দুধর্ম্মরক্ষিণী সত্যাদেবীর দিব্য চক্ষে ধূলি-

মুক্তি প্রক্ষেপ করিয়া, নলডাঙ্গার তৈলবটের সার্থকতা সম্পাদন করিয়াছেন কি না ।

যে আহামক মহামহোপাধ্যায় বিদ্যাবাগীশ খুড়দের বাক্যে বিশ্বাস ও ব্যবস্থায় আস্থা করেন, তাঁর বাপ নির্বংশ ।

ষষ্ঠ প্রশ্ন ।

যে প্রসিদ্ধ পরিবারে, পরম পবিত্র গোমাংস প্রভৃতি পাক করিয়া দিবার নিমিত্ত, বিচক্ষণ মুসলমান পাচক, আর বিশুদ্ধ শূকরমাংস পাক করিয়া দিবার নিমিত্ত, উপযুক্ত হাড়ি পাচক নিযুক্ত থাকে, সেই পবিত্র পরিবারের অতি পবিত্র পুরোহিতকূলে দোষস্পর্শ হইতে পারে কি না ।

যদিও বিধবাবিবাহের সহিত, ঈদৃশ প্রশ্নের কোনও সং-
শ্রব নাই, তথাপি, অনেক দিন অবধি, এই বিষয়টি জানি-
বার নিমিত্ত, আমরা অনেকে অতিশয় উৎসুক আছি ।
এজন্য, এই সুযোগে, এই পরম সুন্দর কণ্ঠসুখকর প্রশ্নটি,
অমায়িক, উদারচিত্ত, নদিয়ার চাঁদ খুড় মহাশয়ের টুকটুকে
রাঙা পায়ে, প্রগাঢ় ভক্তিযোগ সহকারে, চন্দনচর্চিত
পুষ্পাঞ্জলি স্বরূপ, সমর্পিত হইল ।

এই কয় প্রশ্নের উত্তর পাইলেই, বিদ্যারত্ন ও কপিরত্ন,
উভয় খুড় মহোদয়ের সঙ্গে, নানা রঙ্গে, হুড়হুড়ি ও গুঁত
গুঁতি আরম্ভ করিব । প্রশ্নের উত্তর পাইলে, হজ্জাম ও ফেসাৎ
উপস্থিত করিবেক, এমন স্থলে, উত্তর না দেওয়াই ভাল, এই
ভাবিয়া, চালাকি করিয়া, লেজ গুটাইয়া, বসিয়া থাকিলে,
আমি ছাড়িব না । আমি খুড়র বড় খাতির রাখি, এজন্য
প্রসন্নমনে তাঁহাকে এক মাস মিয়াদ দিভেছি ; এই মেয়াদ

মধ্যে উত্তর না পাইলে, সঙ্কল্পিত তুমুল কাণ্ড অবধারিত উপস্থিত করিব; যদি না করি, খুড়র মাথা খাই । যদি বলেন, তোমার ঠিকানা জানি না, উত্তর লিখিয়া কোথায় পাঠাইব । তাহার উত্তর এই, আপনি, যাঁহাদের মন যোগাইবার নিমিত্ত, এই দেবদুর্লভ ব্যবস্থা লিখিয়াছেন, আমার প্রার্থের উত্তর লিখিয়া, সেই সাধুসমাজের অগ্রগণ্য, বিদকুটে ধন্য, বেয়াড়া মান্য, অসামান্যবুদ্ধিবিদ্যাসম্পন্ন মহাপুরুষদিগের নিকটে পাঠাইবেন । তাঁহারা যখন, দেশের ধর্ম্মরক্ষার জন্য, কোমর বাঁধিয়াছেন, তখন আপনকার উত্তর মুদ্রিত ও প্রচারিত করিতে কখনই পরাঙ্মুখ হইতে পারিবেন না । যদি এতাদৃশ দেশহিতকর বিষয়ে পরাঙ্মুখ হন, তাহা হইলে, তাঁহারা, নিঃসন্দেহ, মহাপাতকপ্রাপ্ত ও অন্তে অবধারিত অধোগতি প্রাপ্ত হইবেন । যদি না হন, আমি যেন উজ্জ্বল যাই ।

খুড় মহাশয়ের এই অপূর্ণ ব্যবস্থা দেখিয়া, কতকগুলি অবোধ, অর্ধাচীন, বানরকম্প, অম্পদর্শী লোকে বলিতে আরম্ভ করিয়াছে, হবুচন্দ্র রাজার গবুচন্দ্র পাত্র, যেমন পোড়ামুখ দেবতা তেমনি ঘুটের ছাই নৈবেদ্য । অর্থাৎ, শ্রীমতী যশোহরহিন্দুধর্ম্মরক্ষিণী সভা যেমন অপূর্ণ বিচারালয়, শ্রীমান্ বিদ্যারত্ন খুড় তত্পরযুক্ত ব্যবস্থাদাতা । তাহাদের মধ্যে কেহ কেহ, আতলাদ করিয়া, আমার কাছেও, ঐরূপ নানা কথা, নানা রঙ চড়াইয়া, বলিতে আরম্ভ করিয়াছিল । আমি কিন্তু তাহাদিগকে দূর দূর করিয়া তাড়াইয়া দিয়াছি । ইহাতে, শ্রীমান্ নদিয়ার চাঁদ খুড় মহাশয়, অক্লেশে, বুঝিতে

পারিবেন, উপযুক্ত ভাইপো খুঁড়র দরদেদর দয়দী কি না । ইহা সত্য বটে, এ দেশে খুঁড় ভাইপোয় মুখদেখাদেখি থাকে না ; সর্বদাই ঘেঁষাঘেঁষি, গালাগালি, মারামারি, কাটাকাটি, বলিতে লজ্জা উপস্থিত হয়, জুতাপেটাপেটি পর্য্যন্ত চলিয়া থাকে । খুঁড় যেমন হউন, আমি কিন্তু খুঁড়র তেমন লক্ষ্মীছাড়া ভাইপো নই । যদি সেরূপ লক্ষ্মীছাড়া ভাইপো হইতাম, তাহা হইলে “উপযুক্ত” এই দেবদুর্লভ বিশেষণ লাভ করিতে পারিতাম না, এবং খুঁড় মহাশয়েরাও, প্রফুল্ল চিত্তে, অকৃত্রিম ভক্তিভাবভরে, আমার পরম পবিত্র, কমনীয়, কোমল চরণকমলে, সচন্দন পুষ্পাঞ্জলি প্রদানে তৎপর ও অগ্রসর হইতেন না ।

কোনও অপরিহার্য্য কার্য্যবিশেষের অনুরোধে, আমি, কিঞ্চিৎ কালের নিমিত্ত, সভামণ্ডপের বহির্দেশে গিয়াছিলাম । আবশ্যক কার্য্যের সমাধা করিয়া, প্রত্যাগমন পূর্ব্বক, শুনিতে পাইলাম, এক মহামহোপাধ্যায় বিদ্যাবুড়ুভুড়ি বিদ্যাবাগীশ খুঁড় বড় সুন্দর বক্তৃতা করিয়াছেন । হায় ! হায় ! কেন আমি এমন সময়ে উপস্থিত ছিলাম না, এই বলিয়া, মাথায় চাপড়াইয়া, যৎপরোনাস্তি দুঃখিত হইয়া, বক্তৃতার প্রশংসাকারী ব্যক্তিবর্গের নিকট, বিনয়বাক্যে প্রার্থনা করিলাম, ঐ বক্তৃতার স্থূল মর্ম্ম ও তাৎপর্য্য কি, আপনারা অনুগ্রহ করিয়া বলুন । তাঁহারা, মদীয় অনুরোধের বশবর্তী হইয়া,

অতি সংক্ষেপে, এই মাত্র কহিলেন, বিদ্যাবাগীশ খুড় বলি-
য়াছেন, বিধবাবিবাহসংস্ফুট লোক সকল বিজাতক, অর্থাৎ
তাহাদের জন্মের ব্যত্যয় আছে ; এবং, সভাস্থ সভ্য মহো-
দয়গণ, তদীয় চিত্তহারিণী বক্তৃতা শ্রবণে চমৎকৃত ও পুল-
কিত হইয়া, বক্তাকে মুক্তকণ্ঠে শতমহত্ব সাধুবাদ প্রদান
করিয়াছেন । এই কথা শুনিয়া, কি কারণে বলিতে পারি
না, আমি কিয়ৎ ক্ষণ স্তব্ধ ও হতবুদ্ধির মত হইয়া রহিলাম ;
অনন্তর, স্থিরচিত্তে, সকল বিষয়ের সবিশেষ পর্যালোচনা
করিয়া, উপলব্ধি করিতে পারিলাম, যদি যথার্থই ঐরূপ
বিদ্যাপ্রকাশ করিয়া থাকেন, তাহা হইলে, বক্তা বিদ্যা-
বাগীশ খুড় মহাশয়, নিঃসংশয়, প্রকৃত পণ্ডিতপদবাচ্য ।
কারণ, নীতিশাস্ত্রে নিরূপিত আছে,

আত্মবৎ সৰ্বভূতেষু যঃ পশ্যতি ন পণ্ডিতঃ ।

যিনি সকলকে আপনার মত দেখেন, তিনি পণ্ডিত ।

যাহা হউক, ঈদৃশ অভাবনীয়, অচিন্তনীয় পাণ্ডিত্য-
প্রকাশ দর্শনে, অনির্বচনীয় প্রীতিরসে অভিষিক্ত হইয়া,
উপযুক্ত ভাইপো, কায়মনোবাক্যে, প্রার্থনা ও আশীর্বাদ
করিতেছেন, এই সুশীল, সুবোধ, সুসন্তান, সদ্ধক্তা, সদ্ভিবে-
চক, বিদ্যাবাগীশ খুড়, চিরজীবী, চিরসুখী, ও চিরস্মরণীয়
হইয়া, শ্রীমতী যশোহরহিন্দুধর্ম্মরক্ষিণী সভাদেবীর পোষ্যপুত্র
সাক্ষাৎ ধর্ম্মাবতার অবতারধর্মেণের অবিশ্রান্ত অকৃত্রিম আনন্দ-
বর্দ্ধন করুন ।

ইতি ব্রজবিলাসে মহাকাব্যে কস্তচিৎ উপযুক্ত ভাইপোস্ত কথৌ

চতুর্থ উল্লাসঃ ।

পঞ্চম উল্লাস ।

এতদেশীয় পূজনীয় সাধুসমাজের প্রাতঃস্মরণীয় চাঁই মহোদয়বর্গের নিকট, ক্লুতাঞ্জলিপুটে বিনয়নত্ৰ বচনে আমার নিবেদন এই, আমার এই তাঁড়ামি, বা পাগলামি, অথবা পাণ্ডিত্যপ্রকাশ, দেখিয়া, আপনারা যেন আমায় বিদ্যাসাগরের গোঁড়া, অথবা দলের লোক, না ভাবেন । ইহা যথার্থ বটে, কোনও কোনও কারণে, বিদ্যাসাগরের উপর আমার একটু আন্তরিক টান আছে । যেরূপ দেখিতে ও শুনিতে পাই, লোকটা অমায়িক, নিরহঙ্কার, পরোপকারী ; ষাঁহার নিকটে যান, সকলেই সন্তুষ্ট হইয়া আইসেন । কিন্তু, এই খাতিরে, আমি তাঁহার গোঁড়া বলিয়া পরিচিত ও পরিগণিত হইতে সম্মত নহি । তাঁহার কথা উত্থাপিত হইলে, হৃদয়ুদ্দ এই পর্য্যন্ত বলিতে রাজি আছি, লোকটা বড় মন্দ নয় । এ ভিন্ন, আর সকল বিষয়েই, আমি তাঁহার উপর মৰ্ম্মান্তিক চটা । না চটিয়া, কেমন করিয়া, চলে বলুন । তিনি পবিত্র সাধুসমাজের অনুবর্তী হইয়া চলিতে রাজি নহেন ; নিজে যাহা ভাল বুঝিবেন, তাই বলিবেন, তাই করিবেন ; সাধুসমাজের দ্বিগজ চাঁইদিগের খাতির রাখিবেন না, ও তাঁহাদের নিষ্ফলক দৃষ্টান্তের অনুবর্তী হইয়া চলিবেন না । এমন লোককে, কেমন করিয়া, মানুষ বলিয়া গণ্য করি, বলুন ।

পূৰ্ব্বাপর যেরূপ দেখিয়া আসিতেছি, তাহাতে হতভাগার

বেটার বিষয়বুদ্ধি বড় কম ; এমন কি, নাই বলিলেও, বোধ হয়, অন্যায় বলা হয় না। বিষয়বুদ্ধি থাকিলে, তিনি, কখনই, বিধবার বিবাহকাণ্ডে হস্তক্ষেপ করিতেন না। বিধবার বিবাহে হাত দিয়া, পবিত্র সাধুসমাজে হয় ও অশ্রদ্ধেয় হইয়াছেন, সকল লোকের গালাগালি খাইতেছেন, এবং শুনিতে পাই, ঐ উপলক্ষে দেনাগ্রস্তও হইয়াছেন। ইহারই নাম, আপনার নাক কাটিয়া পরের যাত্রাভঙ্গ করা। এই বাকমারিকাণ্ডে লিপ্ত হওয়াতে, তাঁহার নিজের নাকালের চূড়ান্ত হইয়াছে, এবং পুণ্যভূমি ভারতবর্ষকে, বিশেষতঃ পরম পবিত্র গোড় দেশকে, সর্বোপরি সোনার লক্ষা যশোহরপ্রদেশকে, এক-বারে ছারখার করিতে বসিয়াছেন। এমন বাঁদরামি, এমন পাগলামি, এমন মাতলামি, কেহ কখনও দেখিয়াছেন বা শুনিয়াছেন, আমার এরূপ বোধ হয় না। বুদ্ধিমান ব্যক্তি মাত্রেই বলিবেন, অথবা বলিবেন কেন, যুক্তকণ্ঠে বলিতে-ছেন, তিনি, নাম কিনিবার জন্তে, দেশের সর্বনাশের পথ করিয়াছেন। দেখুন, বাটীতে বিধবা থাকিলে, গৃহস্থের কত মত উপকার হয়। প্রথমতঃ, যিনি মাইনায়, রাঁধুনি, চাকরানি, মেথরানি পাওয়া যায় ; দ্বিতীয়তঃ, সময়ে সময়ে, বাটীর পুরুষদিগের প্রকারান্তরে অনেক উপকার দর্শে ; তৃতীয়তঃ, বাটীর চাকরেরা বিলক্ষণ রশীভূত থাকে, ছাড়াইয়া দিলেও, হতভাগ্য বেটারা নড়িতে চায় না ; চতুর্থতঃ, প্রতিবাসীরা 'অসময়ে বাটীতে আইসেন। এটি নিতান্ত সামান্য কথা নহে ; কারণ, যেরূপ দেখিতে পাওয়া যায়, অসময়ে কেহ কাহারও দিক্ মাড়ায় না। যে

পাশও এই সমস্ত সুবিধা ও উপকারের পথ রুদ্ধ করিবার চেষ্টা করে, তাহার মুখদর্শন করা উচিত নয়।' হুঃখের বিষয় এই, আমরা স্বাধীন জাতি নহি ; স্বাধীন হইলে, এত দিন, কোন কালে, বিদ্যাসাগর বাবাজি স্বশরীরে স্বর্গারোহণ করিতেন। কারণ, স্বাধীন সাধুসমাজের তেজীয়া চাঁই মহোদয়েরা, কখনই, এ অত্যাচার, এ অপমান, সহ্য করিয়া, গায়ের ঝাল গায়ে মারিয়া, চুপ করিয়া থাকিতেন না ; বিদ্রোহী বলিয়া, বিচারালয়ে তাঁহার নামে অভিযোগ উপস্থিত করিতেন, এবং আপনারাই, ধর্মপুত্র যুধিস্থিরের ন্যায়, ধর্মাসনে বসিয়া; তাঁহাকে শূলে চড়াইয়া, যথোপযুক্ত আক্কেলসেলামি দিতেন। হায় রে সে কাল!!! হা জগদীশ্বর! তুমি, কত কালে, সদয় হইয়া, এই হতভাগ্য দেশকে পুনরায় স্বাধীন করিবে। এরূপ যথেষ্টাচার আর আমরা কত কাল সহ্য করিব!!!

বিধবাবিবাহ প্রচলিত হইলে, ব্যভিচার দোষের ও জ্ঞান-হত্যা পাপের নিবারণ হইবেক, এ কথা অর্থ কি! ব্যভিচার যদি বাস্তবিক দোষ বলিয়া গণ্য হইত, তাহা হইলে, এই পবিত্র দেশের অতিপবিত্র সাধুসমাজে, কদাচ এরূপ প্রবল ভাবে প্রচলিত থাকিত না। পুরুষের ব্যভিচার, এ দেশে, দোষ বলিয়া কখনও উল্লিখিত হইতে শুনি নাই ; কেবল স্ত্রীলোকের বেলায়, দোষ বলিয়া গণ্য হইয়া থাকে। কিন্তু, নিবিষ্ট চিত্তে অনুধাবন করিয়া দেখিলে, তাহাতে বাস্তবিক কোনও দোষ আছে, এরূপ প্রতীতি জন্মে না। দোষের কথা দূরে থাকুক, ব্যভিচার, শূঁক 'কালে, সনাতন ধর্ম

বলিয়া পরিগণিত ছিল ; কেহ তাহাতে কিছুমাত্র দোষ বিবেচনা করিত না । ইহা সত্য বটে, উদ্দালক যুনির পুত্র শ্বেতকেতু খুড়, বুড়মি করিয়া, এই সনাতন ধর্ম্মে দোষারোপ করিয়া গিয়াছেন (১)। কিন্তু, তিনি হুনিয়ার মালিক ছিলেন না । তিনি, রাগের বশীভূত হইয়া, না বুঝিয়া সুঝিয়া, এক কথা বলিয়া গিয়াছেন বলিয়া, সকলকে তাহা ঘাড় পাতিয়া লইতে হইবেক, তাহার মানে কি । আর, ইহাও বিবেচনা করিয়া দেখা আবশ্যক, ব্যভিচার সনাতন ধর্ম্ম বলিয়া পরিগণিত । সনাতন শব্দের অর্থ নিত্য, যাহার বিনাশ নাই, যাহা সর্ব্ব কাল বিরাজমান থাকে । শ্বেতকেতুর এত বড় ক্ষমতা ছিল না যে, তিনি নিত্য পদার্থের লোপাপত্তি করিতে পারেন । সে ক্ষমতা থাকিলে, সনাতন ব্যভিচার ধর্ম্ম, কোন কালে, লয়প্রাপ্ত হইতেন, একাল পর্য্যন্ত, নির্ঝরোধে ও অপ্রতিহত প্রভাবে, রাজত্ব ও একাধিপত্য করিতে পাইতেন না । যাহা হউক, যখন ব্যভিচার সনাতন ধর্ম্ম বলিয়া পরিগণিত, এবং যখন সেই সর্ব্বজীবহিতকর সনাতন ধর্ম্ম, পৃথিবীর সর্ব্ব প্রদেশে, বিশেষতঃ পুণ্যভূমি ভারতবর্ষের পরম পবিত্র সাধুসমাজে, আবহমান কাল, এত প্রবলভাবে প্রচলিত রহিয়াছে, তখন উহাকে দোষ বলিয়া গণ্য করা ঘোরতর অধর্ম্মের কর্ম্ম, তাহার সন্দেহ নাই । অতএব, বিদ্যাসাগর বাবাজি, সাধুসমাজে চিরপ্রচলিত সেই প্রশংসনীয় সনাতন ধর্ম্মকে দোষ বলিয়া

গণ্য করিয়া, তাহার নিবারণার্থে বিধবাবিবাহ প্রচলিত হওয়া উচিত বলিয়া, যে পাণ্ডিত্যপ্রকাশ করিয়াছেন, তাহা গ্রাহ্য করা কদাচ উচিত নহে । ফলকথা এই, ব্যভিচার বন্ধ করিবার নিমিত্ত, বিধবা বিবাহ প্রচলিত হওয়া উচিত ও আবশ্যিক, এ কথা অর্থ নাই ।

জ্ঞানহত্যার বিষয়ে বক্তব্য এই যে, নির্বোধ নির্বিকবেক শাস্ত্রকারেরা, কি মতলবে বলিতে পারি না, জ্ঞানহত্যাকে পাপ বলিয়া নির্দেশ করিয়া গিয়াছেন ; সে জন্ম ভয় পাইয়া, বিধবার বিবাহ দেওয়া আবশ্যিক বলিয়া বোধ হয় না । শাস্ত্রকারেরা, নিতান্ত পাগলের মত, কত বিষয়ে কত কথা বলিয়াছেন ; কই, আমরা ত সে সকল কথা গ্রাহ্য করিতেছি না ; তবে এইটির বেলায়, তাঁহাদের খাতির রাখিবার জন্ম, ব্যস্ত হইবার কারণ কি । কিঞ্চিৎ, স্ত্রীলোক, অনন্যোপায় হইয়া, অথবা গুরুজনের খাতিরে বা প্রিয় জনের নাছোড় পীড়াপীড়িতে পড়িয়া, সনাতন ধর্ম্য ব্যভিচার দেবের উপাসনায় প্রবৃত্ত হইলে, প্রকৃতিদেবীর অলঙ্ঘনীয় নিয়ম অনুসারে, গর্ভসঞ্চারণ, অধিকাংশ স্থলে, অপরিহার্য্য ; এবং, পবিত্র সাদুসমাজের অবলম্বিত ও অনুমোদিত প্রথা অনুসারে, জ্ঞানহত্যাও অপরিহার্য্য । অপরিহার্য্য বিষয়ের অনুষ্ঠান বা অনুমোদন, কোনও অংশে দোষাবহ বলিয়া, বিবেচিত হওয়া উচিত নহে । এজন্যই, গোপকুলোদ্ভব ভগবান্ দেবকীনন্দন স্বীয় প্রিয়বান্ধব তৃতীয় পাণ্ডব অর্জুনকে,

জাতস্ত হি ধ্রুবো মৃত্যুর্ধ্রুবং জন্ম মৃতস্ত'চ ।

তন্মাদপরিহার্যেহর্থে ন ত্বং শোচিতুমর্হসি (১) ॥

জন্মিলেই মৃত্যু অবধারিত, মৃত্যু হইলেই পুনর্জন্ম অবধারিত । অতএব, অপরিহার্য বিষয়ে, তোমার শোক করা উচিত নহে ।

এই সারগর্ভ উপদেশ দিয়াছিলেন । সেইরূপ,

জায়াশ্রয়ে ধ্রুবো জ্ঞাণো জ্ঞাণে হত্যা ধ্রুবা স্মৃতা ।

তন্মাদপরিহার্যেহর্থে ন দোষঃ সাধুসংসদি (২) ॥

উপপত্তির আশ্রয়গ্রহণে, গর্ভসংস্কার অবধারিত ; গর্ভসংস্কার হইলে, গর্ভের পাতন অবধারিত । অতএব, অপরিহার্য বিষয়ে, সাধুসমাজে দোষ নাই ।

বস্তুতঃ, সুক্ষ্ম বিবেচনা করিয়া দেখিলে, জ্ঞানহত্যায় কোনও দোষ নাই । জ্ঞানহত্যাকে পাপজনক, বা কোনও অংশে নিন্দনীয়, বলিয়া প্রতিপন্ন করিতে পারেন, কই, এমন বোটা-ছেলে ত, এ পর্য্যন্ত, আমাদের দিব্য চক্ষে ঠেকে নাই । পেট ফাঁপিলে ও পেটে মল জমিলে, ডাক্তরেরা, জোলাপ দিয়া, পেট পরিষ্কার করিয়া দেন । জ্ঞানহত্যাও, পবিত্র সাধু-সমাজের প্রাতঃস্মরণীয় চাঁই মহোদয়দিগের ন্যায়, স্থির চিত্তে বুঝিয়া দেখিলে, তাহার অতিরিক্ত কিছুই নহে । অধিকঞ্চ, সাধুসমাজের অভিমত অভিধান গ্রন্থে, জ্ঞানহত্যা শব্দের যে বিশুদ্ধ ও বিশদ ব্যাখ্যা দেখিতে পাওয়া যায়, তাহাতেও ইহাই প্রতিপন্ন হয় । যথা;—

জ্ঞানহত্যা—সং, প্রীতিপ্রদ প্রয়োগবিশেষ দ্বারা, পেটে ফাঁপ-বিশেষ জন্মিলে, ও মলবিশেষ জমিলে, প্রক্রিয়াবিশেষ দ্বারা, পেটের ঐ ফাঁপবিশেষের নিবারণ, ও পেট হইতে ঐ মলবিশেষের নিকাশন ।

কলকথা এই, জ্ঞানহত্যা, কিঞ্চিৎ অংশেও, দোষাবহ নহে ; দোষাবহ হইলে, আমাদের এই পরম পবিত্র অতি বিচিত্র সাধুসমাজে, কদাচ সচরাচর এরূপ প্রচলিত থাকিত না । এইরূপ চিরপ্রচলিত, দোষস্পর্শশূন্য, সার্বজনীন সদাচারকে পাপ বলিয়া গণ্য করিয়া, তন্নিবারণার্থে বিধবা-বিবাহ প্রচলিত হওয়া উচিত ও আবশ্যিক বলিয়া, পাণ্ডিত্য-প্রকাশ করা, নিরবচ্ছিন্ন উম্মাদের লক্ষণ ব্যতীত, আর কিছুই প্রতীত হয় না ।

সাধুসমাজের বহুদর্শী বিচক্ষণ চাঁই মহোদয়বর্গের মুখে সদামর্ষদা শুনিতে পাই, বিধবারা অবিবাহিত থাকাতে, সমাজের অশেষবিধ হিতসাধন হইতেছে ; তাহাদের বিবাহ প্রচলিত হইলে, দেশটা একবারে ছারখার হইবেক । ইঙ্গরেজী বিদ্যায় যুক্তিমন্ত, জলজিয়ন্ত দেশহিতৈষী, মহাপুরুষদিগের মুখেও, এরূপ কণ্ঠস্থকরী সাধুভাষা, সময়ে সময়ে, শুনিতে পাওয়া যায় । কিন্তু, এ বিষয়ে বিদ্যাবাগীশ খুড় মহাশয়দের মনোগত অভিপ্রায় কি, এ পর্য্যন্ত, কেহ তাহা স্থির বুঝিতে পারেন নাই । তাহার কারণ এই, শ্রীমান্ খুড় মহাশয়েরা নিতান্ত নিরীহ জন্তু ; তাঁহাদিগকে, সকল সময়ে, সকল বিষয়ে, সাধুসমাজের ক্রীতদাসের ন্যায়, চলিতে ও চলিতে হয় ; কোনও বিষয়ে, স্বতঃপ্রসূত হইয়া, অভিপ্রায় প্রকাশ করা তাঁহাদের ইচ্ছা, ক্ষমতা, ও ব্যবসায়ের বহির্ভূত ।

(এক বড় মানুষের কতকগুলি উদ্দেশ্য ছিলেন । আহাৰ প্রস্তুত হইলে, বারু পার্শ্ববর্তী গৃহে গিয়া, আহাৰ করিতে

বসিলেন। উমেদারেরাও, সঙ্গে সঙ্গে, তথায় গিয়া, বাবুর
 আহ্বার দেখিতে লাগিলেন। নূতন পটোল উঠিয়াছে ;
 পটোল দিয়া মাছের ঝোল করিয়াছে। বাবু দুই চারিখান
 পটোল খাইয়া বলিলেন, পটোল অতি জঘন্য তরকারি,
 ঝোলে দিয়া ঝোলটাই খারাপ করিয়াছে। ইহা শুনিয়া,
 উমেদারেরা বিস্ময়াপন্ন হইয়া কহিলেন, কি অন্যায়! আপন-
 কার ঝোলে পটোল !! পটোল ত ভদ্র লোকের খাদ্য নয়।
 কিন্তু, ঝোলে ষত গুলি পটোল ছিল, বাবু ক্রমে ক্রমে সকল
 গুলিই খাইলেন, এবং বলিলেন, দেখ, পটোলটা তরকারি
 বড় মন্দ নয়। তখন উমেদারেরা কহিলেন, পটোল তর-
 কারির রাজা; পোড়ান, ভাজুন, সূতায় দেন, ডালনায় দেন,
 চড়চড়িতে দেন, ঝোলে দেন, ছোকায় দেন, দম্ করুন,
 কালিয়া করুন, সকলেই উপাদেয় হয়; বলিতে কি, এমন
 উৎকৃষ্ট তরকারি আর নাই। বাবু কহিলেন, তোমরা ত
 বেস লোক; যেই আমি বলিলাম, পটোল ভাল তরকারি
 নয়, অমনি তোমরা পটোলকে নরকে দিলে; যেই আমি
 বলিলাম, পটোল বড় মন্দ তরকারি নয়, অমনি তোমরা
 পটোলকে স্বর্গে তুলিলে। উমেদারেরা কহিলেন, মহাশয়,
 আপনি অন্তায় আজ্ঞা করিতেছেন; আমরা ঝোলেরও
 উমেদার নই, পটোলেরও উমেদার নই, উমেদার আপনকার;
 আপনি যাহাতে খুসি থাকেন, তাহাই আমাদের সর্ব
 প্রযত্নে কর্তব্য। এই উত্তর শুনিয়া, বাবু নিরন্তর হই-
 লেন। সেইদৃপ, বিদ্যাবাগীশ খুড় মহাশয়েরা শাস্ত্রেরও
 উমেদার নহেন, ধর্ম্মেরও উমেদার নহেন; তাঁহারা

উষেদার পয়সার ; পয়সাওয়ালারা যাহাতে খুসি থাকেন, তাহাই, তাঁহাদের সৰ্ব্ব প্রযত্নে কর্তব্য বলিয়া, নির্বিবাদে স্থিরীকৃত হইয়া রহিয়াছে ।)

যদি বলেন, সকল পয়সাওয়ালারা ত পয়সা দেন না, তবে কি জন্য তাঁহাদের সকলকে খুসি করিবার চেষ্টা করিবেন । ইহার উত্তর এই, খুড় মহাশয়েরা, গুড়কলম-পিপীলিকা । গুড়ের কলসীর মুখ এমন বদ্ধ করা আছে যে, তাহাতে কোনও মতে প্রবেশ করিবার সম্ভাবনা নাই ; সুতরাং, গুড় খাইতে পাওয়ার প্রত্যাশা সুদূর-পর্যাহত ; তথাপি পিপীলিকারা, গুড়ের গন্ধেই মাত হইয়া, কলসীর চারি দিকে, মারি বাঁধিয়া, ঘুরিয়া বেড়াইতে থাকে । সেইরূপ, বিদ্যাবাগীশ খুড় মহাশয়েরা, পয়সা পান না পান, পয়সার গন্ধে অন্ধ হইয়া, যদি পাই এই প্রত্যাশায়, পয়সাওয়ালার গদির নীচে গরুড়ের ন্যায় বসিয়া, শ্লোক পড়িয়া তোষামোদ ও জল উচু নীচু করেন, এবং যৎকিঞ্চিৎ লাভের লোভ সংবরণে অসমর্থ হইয়া, ইহকালে ও পরকালে এক কালে জলাঞ্জলি দিয়া, পয়সা-ওয়ালাদের খাতিরে, তাঁহাদের অভিমত ব্যবস্থায়, অবিকৃত চিত্তে, স্ব স্ব নাম স্বাক্ষর করিয়া থাকেন ।’ শ্রীমতী যশোহর-হিন্দুধর্ম্মরক্ষিণী সভার চতুর্থ সাংবৎসরিক অধিবেশনে নিম্ন-লিখিত বিদ্যাবাগীশের পাল, এবং পালের গোদা শ্রীমান ব্রজনাথ বিদ্যারত্ন খুড়, যে ব্যবস্থা পত্রে স্বাক্ষর করিয়াছেন, তাহা এ বিষয়ের সর্বোৎকৃষ্ট দৃষ্টান্তস্থল । আশীর্বাদ করি, শ্রীমান পূজ্যপাদ খুড় মহাশয়েরা চিরজীবী হউন । ধর্ম্মকথা

বলিতে গেলে; তাঁহাদের ঈদৃশ ব্যবহার, কোনও অংশে, দোষাৰহ্ণ বলিয়া পরিগণিত হইতে পারে না । কারণ, নীতিশাস্ত্রে ব্যবস্থাপিত আছে—

অর্থশ্চ পুরুষো দাসঃ ।

মানুষ পয়সার গোলাম ।

পয়সার জন্তে, মানুষে না করিতে পারে, এমন কর্ম্মই নাই । দেখুন, চুরি, ডাকাইতি, গলায় ছুরি, জুয়াচুরি, বাটপাড়ি, জাল সাক্ষী, জাল দলীল, জাল মোকদ্দমা, মিথ্যা, প্রবঞ্চনা, প্রভারণা প্রভৃতি এ দেশের লোকের অঙ্গের আভরণ হইয়া উঠিয়াছে । যিনি, যে পরিমাণে, এই সকল বিষয়ে কৃতকার্য্য হইতে পারেন, তিনি, সেই পরিমাণে, সাধুসমাজে, বাহাদুর বলিয়া গণনীয় ও প্রশংসনীয় হইয়া থাকেন ।

অবশেষে, শ্রীমান্ বিদ্যারত্ন খুড়কে, কিছু উপদেশ দিয়া, এবারকার মত, জাল গুড়াইতেছি ।

খুড় মহাশয় !

আপনি বেয়াড়া পণ্ডিত ; কিন্তু, আপনকার মত, বেয়াড়া আনাড়িও প্রায় চক্ষে পড়ে না । যে দিন, সর্বপ্রথম, আপনার চাঁদমুখ ময়নগোচর করিয়া, মানবজন্ম সফল করি, সে দিন, ব্যবস্থা দিবার সময় বচন ফচন দেখা যায় না, এই কবুল দিয়া, হৃদয়ুদ্দ আনাড়ির কর্ম্ম করিয়া-ছিলেম । সাযধান করিয়া দিতেছি, যেন উত্তরকালে, আর কখনও, ওরূপ মুখআলগা না হন । শ্রীমতী যশোহরহিন্দুধর্ম্ম-রক্ষিণী সভাদেবীর, আস্থান অনুসারে, তথায় উপস্থিত হইয়াছিলেন, বেশ করিয়াছিলেন ; তাঁহারা সভায় বক্তৃত্তা

করিতে বলিয়াছিলেন, ভালই ; আপনকারদের দস্তুর মত, পাগলের স্তায়, কতকগুলো অগড়ম বগড়ম বকিয়া, খানিক ক্ষণ গোলমাল করিয়া, বিদায় লইয়া চলিয়া গেলেই, বেস হইত । তাহা না করিয়া, বক্তৃতা লিখিয়া, ফাঁদে পা দিলেন কেন । যে রূপ জড়াইয়া পড়িয়াছেন, ছাড়াইয়া উঠা কঠিন । বলিতে কি, আপনি অতি বড় বক্তৃৎস্বর । এক্ষণে, আপনাকে এই উপদেশ দিতেছি, আপনাদের সমাজের সর্ব-প্রধান নৈয়ায়িক শ্রীমান্ ভুবনমোহন বিদ্যারত্ন খুড় মহাশয়ের নিকট, কিছু দিন জ্ঞান শিক্ষা করিবেন । তিনি, আপনকার মত, বেহৌস আছলদিয়া ছোকরা, বা কাছাআলগা লোক, নহেন । কিছু দিন হইল, নৈয়ায়িক বিদ্যারত্ন খুড়, শিষ্টাল-দহ ইন্টেশনে, খুলনার অন্তঃপাতী নৈহাটীনিবাসী শ্রীযুক্ত বাবু কৈলাসচন্দ্র বসুর সহিত, বিধবাবিবাহ বিষয়ে বাদ্যমুবাদ করিতেছিলেন । বিদ্যাসাগর, বচনের অযথা অর্থ লিখিয়া, লোককে প্রতারণা করিয়াছেন ; নৈয়ায়িক বিদ্যারত্ন খুড় এইরূপ বলাতে, নিকটবর্তী এক ব্যক্তি কহিলেন, বিদ্যাসাগর, বচনের অযথা অর্থ লিখিয়া, লোককে প্রতারণা করিয়াছেন, যদি আপনকার এরূপ বোধ ও বিশ্বাস থাকে, তাহা হইলে, ঐ সমস্ত লিখিয়া, সর্ব সাধারণের গোচরার্থে, প্রচারিত করা আপনকার উচিত । তাহাতে নৈয়ায়িক বিদ্যারত্ন খুড় কহিলেন,

“শতং বদ মা লিখ ।”

শতবার বলিও, লিখিও না ।

কোনও বিষয়ে কোনও কথা বলিলে, যদি উত্তর কালে

ধরাধরি পড়ে, কোন শালা বলিয়াছে বলিলেই, নিকৃতি পাওয়া যায়; লিখিলে, ফাঁদে পা দেওয়া হয়, সহজে এড়াইতে বা ভাঁড়াইতে পারা যায় না । এজন্যই, পূর্বোক্ত নীতিবাক্যে, লিখিতে নিষেধ । দেখুন দেখি, আপনারা দুজনেই, এক এক বিষয়ে, সর্বপ্রধান সমাজের সর্বপ্রধান ব্যক্তি ; উভয়েই বিদ্যারত্ন উপাধি ধরেন ; উভয়েই সর্বত্র সর্বপ্রধান বিদায় মারিয়া থাকেন । কিন্তু, বুদ্ধি ও বিবেচনা বিষয়ে, উভয়ের আসমান জমীন ফরক । তিনি, পাগলের মত বেড় বেড় করিয়া বকিয়া, লোককে জ্বালাতন করিতে সম্মত আছেন ; কিন্তু, লিখিয়া ফাঁদে পা দিতে, কোনও মতে, সম্মত নছেন । আপনি এমনই আনাড়ি, তাড়াতাড়ি লিখিয়া, ফাঁদে পা দিয়া জড়াইয়া পড়িলেন ।

যদি বলেন, আমার উপরেই তোমার এতটা চোট কেন । আমাতে ও নৈয়ায়িক বিদ্যারত্নে তফাৎ কি । আমরা উভয়েই ত, বিদায়ের সময়, এক ব্যবস্থায় স্বাক্ষর করিয়াছি । ইহা সত্য বটে, আপনারা উভয়েই এক ব্যবস্থায় স্বাক্ষর করিয়াছেন ; কিন্তু, সে জন্যে আমি আপনাদিগকে ধর্মতঃ অপরাধী করিতে পারি না । সে স্বাক্ষর আপনারা স্বেচ্ছা পূর্বক করেন নাই ; তাহা কেবল পয়সাওয়ালাদের খাতিরে ও পীড়াপীড়িতে করিতে হইয়াছে । ঐ স্বাক্ষর না করিলে, আপনাদের, এ জন্মে আর, যশোহর প্রদেশে প্রবেশ করিবার অধিকার থাকিত না ; এবং সেরূপ ঘটিলে, আমিই আবার আপনাদিগকে, আনাড়ির চুড়ামণি ও বেঁঅকুফের শিরোমণি বলিয়া, শত

সহস্র বার তিরস্কার করিতাম । পরমাওয়ালাদের মনো-
রঞ্জনই বিদ্যাবাগীশ দলের বিদ্যাভ্যাস ও শাস্ত্রামূলীননের
এক মাত্র উদ্দেশ্য, ইহা কাহারও অবিদিত নহে । আমার
সূক্ষ্ম বিচারে, সে বিষয়ে আপনাদের সাত খুন মাপ ।
আপনকার সন্তোষার্থে, অধিক আর কি বলিব, পরমা-
ওয়ালাদের খাতিরে বা পীড়াপীড়িতে, কোনও কৰ্ম করিলে,
যদি কেহ আপনাদের উপর, কোনও প্রকারে, দোষারোপ
করিতে অগ্রসর হয়, আমি খোদ হাকিমি করিয়া, শ্রীমতী
যশোহরহিন্দুধর্মরক্ষিণী সভা দেবীর সহায়তা গ্রহণ পূর্বক,
তাহাকে ফাঁসি দিতে, শূলে চড়াইতে, অথবা জন্মের মত
দ্বীপান্তরে পাঠাইতে, ক্ষণ মাত্র বিলম্ব করিব না ।

কিছু দিন হইল, অধুনা লোকান্তরবাসী, এক চিরস্মরণীয়,
বহুদর্শী বিচক্ষণ,

পণ্ডিতে চ গুণাঃ সর্কে মূর্খে দোষা হি কেবলম্ । ✓

এই নীতিবাক্যের, “পণ্ডিতের সব গুণ, দোষের মধ্যে
বেটারা বড় মূর্খ,” এই ব্যাখ্যা করিয়াছিলেন । নিবিষ্টচিত্তে,
বিশিষ্টরূপ বিবেচনা করিয়া বলুন দেখি, এই চমৎকারিণী
ব্যাখ্যা সর্কাংশে সুসঙ্গত বলিয়া নির্বিবাদে প্রতিপন্ন হয়
কি না ।

যাহা হউক, আপনি আর এরূপ কাঁচা কৰ্ম না
করেন, এই আমার প্রার্থনা, এই আমার অনুরোধ, এই
আমার উপদেশ । পুনরায় এরূপ কাঁচা কৰ্ম করিলে, যদিও
খুড় বলিয়া খাতির রাখিয়া, বাঁদরামি করিয়াছেন, না বলি ;
পাগলামি বা মাতলামি করিয়াছেন, এ কথা বলিতে কিছু

মাত্র সঙ্কচিত হইব না । অলমতিবিস্তরেণ ; অর্থাৎ, এ বার
এই পর্য্যন্ত ।

খুড়র গুণের কথা অতি চমৎকার ।

এমন গুণের খুড় না হেরিব আর ॥

খুড়টির গুণের বালাই লয়ে মরি ।

খুড়র পিরিতে সবে বল হরি হরি ॥

হরিবোল ! হরিবোল !

হরিবোল !

ইতি ব্রজবিলাসে মহাকাব্যে কস্মচিৎ উপযুক্ত ভাইপোস্ত্য কৃতৌ
পঞ্চম উল্লাসঃ ।

সমাপ্তমিদম্ পূর্ব্বাৰ্দ্ধম্ ।

প্রথম পরিশিষ্ট

জনমেজয় খুড় মহাশয় যখন উপাধি পান, সে সময়ে আমি অন্তমনস্ক ছিলাম। এজন্য, তিনি কি উপাধি পাইলেন, শুনিতে পাই নাই। পার্শ্ববর্তী লোকদিগকে জিজ্ঞাসা করিতে, কেহ কেহ কহিলেন “কপিরত্ন”, কেহ কেহ কহিলেন, “কবিরত্ন”। আমি বিষম সঙ্কটে পড়িলাম। উভয় পক্ষে লোক-সংখ্যা সমান, সুতরাং, অধিকাংশের মতে কার্য শেষ করিবার পথ ছিল না। অবশেষে, অনেক ভাবিয়া চিন্তিয়া, আপাততঃ “কপিরত্ন” বলাই সাব্যস্ত করিলাম। কারণ, যদি উত্তর কালে কবিরত্ন বলিতে হয়, তাহার পথ পরিষ্কার রহিল। কপ্—ই এই দুয়ের সন্ধি করিলে, কবি হইতে পারিবেক; কিন্তু, এখন কবিরত্ন বলিলে, যদি উত্তর কালে কপিরত্ন বলা আবশ্যক লাড়ায়, তাহার আর উপায় থাকিবেক না। ব্যাকরণের সূত্র অনুসারে, স্বরবর্ণ পরে থাকিলে, পদের অন্তস্থিত প স্থানে ব হয়; কিন্তু, ব স্থানে প হইবার বিধান নাই। যদি কেহ আপত্তি করেন, পস্থানে যে ব হয়, তাহা বর্গীয়; কিন্তু, কবি শব্দের ব অন্তঃস্থা; এমন স্থলে, ওরূপ সন্ধি দ্বারা, কি রূপে, কবিশব্দ সম্পন্ন করিবে। ইহার উত্তর এই, যখন এ দেশে উভয় বকারের, কি আকার, কি উচ্চারণ, কোনও অংশে কোনও প্রভেদ নাই, তখন বর্গীয় ও অন্তঃস্থা বকারের কথা তুলিয়া, আপত্তি উত্থাপন করা খাটি বোকার কন্ঠ।

এক গ্রামে দুই বিদ্যাবাগীশ খুড় ছিলেন। ইঁহারা দুই সহোদর। জ্যেষ্ঠ নৈয়ায়িক, কনিষ্ঠ স্মার্ত্ত। এক দিন, এক ব্যক্তি ব্যবস্থা জানিতে গিয়াছিলেন। স্মার্ত্ত বিদ্যাবাগীশ বাটীতে নাই শুনিয়া, তিনি চলিয়া যাইতেছেন দেখিয়া, নৈয়ায়িক বিদ্যাবাগীশ জিজ্ঞাসা করিলেন, তুমি কি জন্তে আসিয়াছ। তিনি কহিলেন, আমার একটা তিন বৎসরের দৌহিত্র মরিয়াছে; তাহাকে পুতিব বা পোড়াইব, ইহার ব্যবস্থা জানিতে অস্মিলাছি। নৈয়ায়িক অনেক ভাবিয়া চিন্তিয়া কহিলেন, তাহাকে পুতিয়া ফেল। সে ব্যক্তি জানিতেন, তিন বৎসরের ছেলেকে পোড়াইতে হয়, পুতিতে হয় না; তথাপি, সন্দেহ করিয়া, জিজ্ঞাসা করিতে আসিয়াছিলেন। এক্ষণে, পুতিতে হইবে, এই ব্যবস্থা শুনিয়া, সন্দেহ মনে ফিরিয়া যাইতেছেন; এমন সময়ে, পশ্চিমদো, স্মার্ত্তের সহিত সাক্ষাৎ হইলে,

জিজ্ঞাসিলেন, পুতিবু না পোড়াইব। তিনি পোড়াইতে বলিলেন। তখন সে ব্যক্তি কহিলেন, তবে বড় মহাশয় পুতিতে বলিলেন, কেন। স্বার্থ, জ্যেষ্ঠের মান রক্ষার জন্ত, কহিলেন, তিনি পরিহাস করিয়াছেন। অনন্তর তিনি, বাটীতে গিয়া, জ্যেষ্ঠকে কহিলেন, কি বুঝিয়া আপনি এমন ব্যবস্থা দিলেন। পোড়াইবার স্থলে পুতিতে বলা অতি অজ্ঞায় হইয়াছে। নৈয়ায়িক কহিলেন, আমি, অনেক বিবেচনা করিয়াই, পুতিতে বলিয়াছি। পুতিয়া রাখিলে, যদি পোড়াইবার দরকার হয়, তুলিয়া পোড়াইতে পারিবেক; কিন্তু, যদি পোড়াইতে বলিতাম, তখন পোড়াইয়া ফেলিলে, যদি পুতিবার দরকার হইত, তখন কোথায় পাইত।

যেমন পোড়াইবার দরকার হইলে, তুলিয়া পোড়াইতে পারিবেক, এই বিবেচনা করিয়া, নৈয়ায়িক পুতিবার ব্যবস্থা দিয়াছিলেন; সেইরূপ, কবিরত্ন বলা আবশ্যক হইলে, প স্থানে ব করিলেই চলিবেক, এই বিবেচনায়, উত্তর কালের পথ পরিষ্কার রাখিয়া, আমি কপিরত্ন উপাধিই সাব্যস্ত করিলাম; পরে যদি প্রমাণ প্রয়োগ দ্বারা প্রতিপন্ন হয়, খুড় মহাশয় কবিরত্ন উপাধি পাইয়াছেন; তখন, পূর্বোক্ত প্রণালীতে, প স্থানে ব করিলেই, সর্বোংশে নিখিরকিচ হইবেক।

কপিরত্ন উপাধি সাব্যস্ত রাখিবার জন্ত, যে প্রবল যুক্তি ও উৎকৃষ্ট দৃষ্টান্ত দেখাইলাম, তাহা অকাট্য; কার বাপের সাধ্য, তাহাতে দস্তফুট করে। এমন কি, “নবদ্বীপচন্দ্র, পণ্ডিতাগ্রগণ্য, সুপ্রসিদ্ধ বাগ্মী,” নৈয়ায়িক পালের গোদা, ত্রিযুত ভুবনমোহন বিদ্যারত্ন খুড় মহাশয়ও, সাহস করিয়া, তাহার প্রতিবাদ করিতে অগ্রসর হইতে পারিবেন না।

কিঞ্চ, শাস্ত্রকারেরাও ব্যবস্থা করিয়া রাখিয়াছেন,

“প্রথমোপস্থিতপরিত্যাগে প্রমাণাভাষঃ”।

যাহা প্রথম উপস্থিত, তাহার পরিত্যাগ অপ্রামাণিক।

ব্রহ্মমালা পাঠ করিতে আরম্ভ করিলে, প প্রথম উপস্থিত হয়, তৎপরে ব; এমন স্থলে, প পরিত্যাগ করিয়া ব ধরিতে গেলে, অর্থাৎ কপিরত্ন না বলিয়া কবিরত্ন বলিলে, উপরি দর্শিত প্রামাণিক ব্যবস্থার অপ্রামাণ্য ঘটে। ভদ্রির, প অক্ষরটি মোলায়ম, ব অক্ষরটি কড়।; জনমেজয় খুড় বেক্রপ রসিকের

চূড়ামণি, তাঁহার উপাধিটি যত্নে মোলায়ম জ্ঞপ্তি বানান যাইবেক, ততই মানানসই হইবেক ; এ বিবেচনাতেও, কপিরত্ন বলাই উচিত ৬) আবশ্যক । সভায় উপস্থিত বিদ্যাবাগীশ পালের মধ্যে, যদি কেহ বহুদর্শী আলঙ্কারিক থাকেন, তিনিই এই মীমাংসার প্রকৃত রূপ তাৎপর্য গ্রহ করিতে পারিবেন । স্মার্ত নৈয়ায়িক প্রভৃতি পালের গোদারা, ফেল ফেল করিয়া চাহিয়া থাকিবেন, ভিতরে প্রবেশ করিতে পারিবেন না ।

অপরঞ্চ, ষটকচূড়ামণি, প্রথম দশায়, “কচি পাঠা” এই অপূর্ব উপাধি পাইয়াছিলেন । বোকা পাঠা উপাধি হইলে, তিনি লোকালয়ে অধিকতর বলবিক্রমশালী বলিয়া প্রতিষ্ঠিত হইতে পারিবেন, এই প্রবল যুক্তি দেখাইয়া, কেহ কেহ কচি শব্দ স্থলে বোকা শব্দ বসাইতে চাহিয়াছিলেন । এ বিষয়ে নানা তর্ক ও বিস্তর বাদানুবাদও হইয়াছিল । অবশেষে, “বোকা পাঠা” অপেক্ষা “কচি পাঠা” মোলায়ম, নিরবচ্ছিন্ন এই বিবেচনায়, “কচি পাঠা” উপাধিই সাব্যস্ত হয় । এ অনুসারেও, কপিরত্ন উপাধি সাব্যস্ত হওয়াই, ষটকচূড়ামণি খুড় মহাশয়েব পক্ষে, সর্বতোভাবে বিধিসিদ্ধ হইতেছে ।

দ্বিতীয় পরিশিষ্ট ।

অনারতাঃ কিল পুরা দ্বিয় আসন্ বরাননে ।
কামচারবিহারিণ্যঃ স্বতদ্বাশ্চারহাসিনি ॥
তাশাং ব্যাচরমাণানাং কৌমারাং সুভগে পতীন্ ।
নাধর্মোহভূবরারোহে স হি ধর্মঃ পুরাভবৎ ॥
প্রমাণহস্তৌ ধর্মোহয়ং পূজ্যতে চ মহর্ষিভিঃ ।
উত্তরেষু চ রশ্মোরু কুরুক্স্যাপি পূজ্যতে ॥
স্ত্রীণামনুগ্রহকরঃ স হি ধর্মঃ সমাতনঃ ॥
অস্মিংস্ত লোকে ন চিরান্মর্যাদেয়ং শুচিস্মিতে ।
স্থাপিতা যেন যস্মাচ্চ তন্নে বিস্তরতঃ শৃণু ॥
বভূবোদ্ধালকো নাম মহর্ষিরিতি নঃ শ্রুতম্ ।
শ্বেতকেতুরিতি খ্যাতঃ পুত্রস্তস্তাভবন্মুনিঃ ॥
মর্যাদেয়ং ক্রুতা তেন ধর্ম্যা বৈ শ্বেতকেতুনা ।
কোপাং কমলপত্রাক্ষি যদর্থং তং নিবোধ মে ॥
শ্বেতকেতোঃ কিল পুরা সমক্ষং মাতরং পিতুঃ ।
জগ্রাহ ব্রাহ্মণঃ পাণৌ গচ্ছাব ইতি চাব্রবীৎ ॥
ঋষিপুত্রস্ততঃ কোপং চকারামর্ষচোদিতঃ ।
মাতরং তাং তথা দৃষ্ট্বা নীয়মানাং বলাদিব ॥
ক্রুদ্ধং তন্ত পিতা দৃষ্ট্বা শ্বেতকেতুর্মুবাচ হ ।
মা তাত কোপং কার্ষীন্দ্রমেষ ধর্মঃ সনাতনঃ ॥
অনারতা হি সর্বেষাং বর্ণানামঙ্গনা ভুবি ।
যথা গাবঃ স্থিতাস্তাত স্বে স্বে বর্ণে তথা প্রজাঃ ॥
ঋষিপুত্রোহথ তং ধর্মং শ্বেতকেতুর্ন চক্ষমে ।
চকার চৈবামর্যাদানিমাং স্ত্রীপুংসয়োভুবি ॥

মাহুৰেষু মহাভাগে নমস্কেৰাত্তেষু কন্তবু ।
 তদা প্রভৃতি মৰ্যাদা স্থিতেয়মিতি নঃ শ্রুতম্ ॥
 ব্যুচ্চরন্ত্যাঃ পতিং মাৰ্ঘ্যা অথ প্রভৃতি পাতকম্ ।
 জগৎহত্যাসমং ঘোরং ভবিষ্যত্যশুখাবহম্ ॥
 ভাৰ্য্যাং তথা ব্যুচ্চরতঃ কৌমাৰব্রহ্মচাৰিণীম্ ।
 পতিব্রতামেতদেব ভবিতা পাতকং ভুবি ॥
 পত্যা নিবৃত্তা বা চৈব পত্নী পুত্ৰাৰ্ধম্বেষ চ ।
 ন কৰিষ্যাতি তস্মাচ্চ ভবিষ্যাতি ভদ্রেব হি ॥
 ইতি তেন পুৰা ভীৰু মৰ্যাদা স্থাপিতা বলাৎ ।
 উদ্ধালকস্য পুত্ৰেণ ধৰ্ম্ম্যা বৈ শ্বেতকেতুনা (১) ॥

পাণ্ডু কুন্তীকে কহিতেছেন, হে শ্রুগি ! চাক্ৰহাসিনি ! পূৰ্ণ কালে
 জীলোকেরা অরুদ্ধা, স্বাধীনা, ও সজ্জনবিহারিণী ছিল। পতিক্কে অতিক্রম
 করিয়া, পুরুষান্তবে উপগতা হইলে, তাহাদের অধৰ্ম্ম হইত না। পূৰ্ণ কালে
 এই ধৰ্ম্ম ছিল ; ইহা প্রামাণিক ধৰ্ম্ম ; ঋষিরা এই ধৰ্ম্ম মান্ত করিয়া থাকেন ;
 উত্তরকুরুদেশে অন্যাপি এই ধৰ্ম্ম মান্ত ও প্রচলিত আছে। এই সনাতন ধৰ্ম্ম
 জীদিগের পক্ষে অত্যন্ত অশুকল। যে ব্যক্তি যে কারণে লোকে এই নিয়ম
 স্থাপন করিয়াছেন, তাহা বিস্তারিত কহিতেছি, শুন। শুনিয়াছি, উদ্ধালক নামে
 মহৰ্ষি ছিলেন ; শ্বেতকেতু নামে তাঁহার এক পুত্র জন্মে। সেই শ্বেতকেতু, যে
 কারণে কোপাবিষ্ট হইয়া, এই ধৰ্ম্মযুক্ত নিয়ম স্থাপন করিয়াছেন, তাহা শুন।
 একদা উদ্ধালক, শ্বেতকেতু, ও শ্বেতকেতুর জননী, তিন জনে উপবিষ্ট আছেন ;
 এমন সময়ে, এক ব্রাহ্মণ আসিয়া শ্বেতকেতুর মাতার হস্তে ধরিলেন, এবং, এস
 যাই বলিয়া, একান্তে লইয়া গেলেন। তখন, ঋষিপুত্র, এইরূপে জননীকে নীচ-
 মানা দেখিয়া, সহ্য করিতে না পারিয়া, অত্যন্ত কুপিত হইলেন। উদ্ধালক শ্বেত-
 কেতুকে কুপিত দেখিয়া কহিলেন, বৎস ! কোঁপ করিও না, এ সনাতন ধৰ্ম্ম ।
 পৃথিবীতে সকল বর্ণেরই জী অরক্ষিত। গোজাতি যেমন স্বচ্ছন্দ বিহার করে,

মহাযোরাও সেইরূপ স্ব স্ব বর্ণে স্ব স্ব বিহার করে। ঋষিপুত্র খেতকেতু, সেই ধর্ম সহ্য করিতে না পারিয়া, পৃথিবীতে দ্বীপুকরের সহকে এই নিয়ম স্থাপন করিয়াছেন। হে মহাভাগে! আমরা শুনিয়াছি, তদবধি এই নিয়ম মনুষ্য-জাতির মধ্যে প্রচলিত আছে; কিন্তু অন্ত অন্ত জন্তুদিগের মধ্যে নহে। অতঃপর যে নারী পতিকে অতিক্রম করিবেক, তাহার ক্রণহত্যার সমান অশুখ-জনক ঘোর পাতক জন্মিবেক। আর, যে পুরুষ বাল্যাবধি সাধুশীল পতিব্রতা পত্নীকে অতিক্রম করিবেক, তাহারও ভূতলে সেই পাতক হইবেক। এবং যে দ্বী, পতি কর্তৃক পুত্রার্থে নিযুক্ত হইয়া, তাঁহার অজ্ঞা প্রতিপালন না করিবেক, তাহারও এই পাতক হইবেক। হে ভয়শীলে! সেই উদ্ধালকপুত্র খেতকেতু, বল পূর্বক, পূর্ব কালে এই ধর্মযুক্ত নিয়ম স্থাপন করিয়াছেন।

PRINTED BY PITAMBARA VANDYOPADHYAYA.

AT THE SANSKRIT PRESS. 62. AMHERST STREET.

1884.

